

## Taith i Wlad Belg



Aeth criw o 31, yn blant, athrawon a rhieni o Ysgol Gynradd Castellau ar daith chwaraeon fythgofiadwy i Frwsel dros y Pasg. Yn ôl y sôn hwn oedd y tro cyntaf i ysgol gynradd o Gymru gymryd rhan mewn cystadleuaeth o'r fath ar y cyfandir.

Roedd tipyn o gyffro cyn mynd gyda noddwyr yn darparu cit newydd i bob tîm, y BBC yn darlledu dwy eitem ar raglen Ffeil a Mick Antoniw ein haelod o'r Cynulliad yn galw i ddymuno'n dda i'r plant.

I ychwanegu at y cynnwrf teithiodd y criw allan ar fws moethus cwmni Edwards. Croeson ni ar fôr caredig, y tro cyntaf i hanner y plant deithio ar long, cyn teithio i Ysgol Brydeinig Brwsel.

Yn dilyn gêm bêl-droed yn erbyn yr oedolion, cyffro enfawr wrth gwrdd â'u teuluoedd am y penwythnos. Codi'n gynnar fore Sadwrn i weld haen o eira dros y caeau, tywydd perffaith am ddiwrnod o rygbi a pêl-rwyd! Diwrnod o gystadlu brwd yn erbyn timau o Ffrainc, Luxembourg, Lloegr a thimau lleol. Dychwelyd i dai'r teuluoedd am gawod twym cyn blasu rhywfaint o'r wlad trwy ymweld â Brwsel a mwynhau gwyl fwyd.

Bore Sul cafwyd cyfres o gemau pêl-droed cymysg cyn gorfod ffarwelio a bwrw nôl am Gymru.

Am brofiad anhygoel a nifer yn ysu am fynd eto.



## Marathon Llundain

Llongyfarchiadau i Hefin Gruffudd, Efail Isaf, ar gwblhau Marathon Llundain, dydd Sul, 21 Ebrill, mewn tair awr a 38 munud. Bu'n casglu tuag at elusen Dolen Cymru.



## Côr Cymru

Llongyfarchiadau i Elin Llywelyn-Williams, Arweinydd Côr y Cwm, a dderbyniodd tlws ffefryn y gwylwyr yn dilyn pleidlais ffôn a gynhaliwyd yn ystod rownd derfynol y gystadleuaeth.



## Llwyddiant tîm rygbi o dan 13 Pentyrch



Llongyfarchiadau mawr i fechgyn tîm rygbi o dan 13 Pentyrch ar eu buddugoliaeth wych yn nhwrnamaint Talaith Caerdydd a'r Fro ddydd Sul y 14 Ebrill. Roeddent yn fuddugol ar ôl curo Tredelerch - Rhymni - mewn gêm derfynol hynod o gyffrous. Mae nifer o'r bechgyn yn gyn-ddisgyblion Ysgol Creigiau a bellach ym mlwyddyn 8 yn Ysgol Gymraeg Plasmawr.

Da iawn chi fechgyn a diolch i'r hyfforddwyr am eu cefnogaeth a'u hymroddiad.



# tafod elái

**GOLYGYDD**  
Penri Williams  
029 20890040

**HYSBYSEBION**  
David Knight 029 20891353

**CYHOEDDUSRWYDD**  
Colin Williams  
029 20890979

Cyhoeddir y rhifyn nesaf  
ar 7 Mehefin 2013  
Erthyglau a straeon  
i gyrraedd erbyn  
24 Mai 2013

**Y Golygydd**  
Hendre 4 Pantbach  
Pentyrch  
CF15 9TG  
Ffôn: 029 20890040  
e-bost  
pentyrch@tafelai.net

*Tafod Elái ar y wê*  
<http://www.tafelai.net>



**Argraffwyr:**  
Gwasg Morgannwg  
Castell Nedd SA10 7DR  
Ffôn: 01792 815152

Cydnabyddir Cefnogaeth



Ariennir gan  
**Lywodraeth Cymru**  
Funded by  
**Welsh Government**

**Gwasanaeth addurno,  
peintio a phapuro**

**Andrew Reeves**

Gwasanaeth lleol  
ar gyfer eich cartref  
neu fusnes

**Ffoniwch**

Andrew Reeves  
01443 407442  
neu  
07956 024930

I gael pris am unrhyw  
waith addurno



**MERCHED Y WAWR**  
Cangen y Garth

**Noson yng Nghwmni'r  
Dr Neville Evans  
'Gwyddonwyr Cymru'**

8.00yh Nos Fercher  
8, Mai  
Canolfan Tabernacl,  
Efail Isaf

Am ragor o fanylion,  
ffoniwch: 029 20890040



**CLWB Y  
DWRLYN**

**Bwffe a Sbri**

**Nos Fawrth,  
18 Mehefin  
Clwb Rygbi Pentyrch  
am 6.30 o'r gloch**

Manylion: 029 20890040

**Ysgol Castellau**  
(Parhad o dudalen 1)



**Trip Meithrin a Derbyn i 'Cakes'n Shakes**


Fel rhan o'n gwaith thema ar yr ardal leol aethom ni, y dosbarth Derbyn a'r Dosbarth Meithrin, am dro i'r caffi lleol Cakes'n Shakes. Cawsom groeso mawr yno a chafodd y plant gyfle i ddewis, archebu a thalu am ysgythaeth blasus a bisgedi oedd wedi eu gwneud yn arbennig ar eu cyfer. Fe wnaethom ni fwynhau yn fawr iawn.

**Gohebydd Newydd**

Croeso i Emma Thompson i'r criw prysur sy'n bwydo newyddion i Tafod Elái. Bydd Emma yn casglu newyddion yn ardal Llanilltud Faerdref.

**Bore Coffi i'r dysgwyr**

yng Nghaffi Leekes, Tonysguboriau,  
bob bore Gwener  
o 11 hyd hanner dydd.  
Croeso cynnes i chi  
ymuno â'r criw.



**Owen Griffith Jones**  
Dip RSL  
Hyfforddiant Piano

Athro piano profiadol,  
proffesiynol gydag agwedd  
bositif a chreadigol.  
Arholiadau ABRSM (Perfformiad  
a Theori) neu am bleser yn unig  
– croeso i bob oedran.  
Cysylltwch a mi i drafod eich  
anghenion.

3 Graig Cottages  
Miskin, Pontyclun  
CF72 8JR  
Prif Ffon : 01443 229479  
Ffon Symudol : 07902 845329

CERDD BYW



12.05.2013  
**AL LEWIS BAND**  
24.05.2013  
**RT DIXIE BAND**  
25.05.2013  
**RICHARD JAMES**  
7.06.2013  
**CATRIN FINCH**  
8.06.2013  
**GWYNETH GLYN & TAUSEEF AKHTAR**  
9.09.2013  
**BANDALAW**  
tocynnau  
[www.acapela.co.uk](http://www.acapela.co.uk) 08448 700 887  
neu doctor 8.30am - 10am

## GWAELOD Y GARTH A FFYNNON TAF

Gohebydd Lleol: June Huws

### Priodas

Priodwyd Laura Evans a Lee Pinney yn ddiweddar. Mae Laura yn ferch i John a Hazel Evans, Ty Llwyd, Gwaelod-y-garth ac mae Lee yn wreiddiol o Cwm, yng Ngwent. Mae Lee yn gweithio i Gyngor Sir Caerffili a Laura yn gweithio i Gyngor Gofal Cymru. Mae'r ddau wedi ymgartrefu yn Llanbradach. Dymuniadau gorau iddynt ar gyfer y dyfodol.

## Hyrwyddwr Dwyieithrwydd Coleg Morgannwg

Gyda chymorth ariannol mae Coleg Morgannwg wedi penodi Hyrwyddwr Dwyieithrwydd newydd. Bydd y swydd newydd, sef Jamie Bevan o Ferthyr Tudful, yn gyfrifol am ehangu a datblygu darpariaeth Gymraeg y coleg ar draws y tri champws. Bydd Jamie wedi ei leoli ar Gampws newydd Nantgarw ond fe fydd hefyd yn gweithio yng ngholeg Aberdâr a'r Rhondda.

Efallai bydd rhai ohonoch yn nabod Jamie am ei waith gyda Menter Merthyr a Chymdeithas yr Iaith. Mae e hefyd yn parhau gyda'i waith fel tiwtor Cymraeg i Oedolion gyda Chanolfan CiO Morgannwg.

Meddai Jamie: 'Dwi wirioneddol yn edrych ymlaen at fy swydd newydd. Mae problem gyda phobol ifanc yn gadael ysgolion cyfrwng Cymraeg a'r Gymraeg yn cael ei gadael tu ôl iddynt. Dwi'n edrych ymlaen at gael rôl mewn newid y tueddiad hwnna. Mae gyda'r colegau addysg bellach rôl bwysig i chwarae wrth newid agweddau pobol ifanc tuag at yr iaith yn ogystal ag hyfforddi gweithluoedd Cymraeg y dyfodol.'

Dros y misoedd nesaf fe fydd modiwlau Cymraeg yn cael eu cyflwyno yn ogystal ag ehangu ar y ddarpariaeth ddwyieithog ar gysiau'r coleg. Fe fydd hefyd cymorth pellach i staff a myfyrwyr sydd am ddefnyddio'u Cymraeg ac i'r rheini sydd am fagu hyder a gwella'u sgiliau ieithyddol.

Mae Jamie yn gwahodd unrhyw un sydd am gysylltu, staff, myfyrwyr, darpar fyfyrwyr a'r cyhoedd, sydd ag unrhyw ymholiadau parthed y Gymraeg a Choleg Morgannwg i gysylltu â fe, naill ai trwy e-bost

J.Bevan@morgannwg.ac.uk neu trwy ffonio'r coleg ar 01443 662800

## TONYREFAIL

Gohebydd Lleol:  
Helen Prosser  
671577/prosserh@btinternet.com

### Pen-blwydd Hapus yn 90 oed

Y mis diwethaf, buom yn dymuno pen-blwydd hapus i DJ Davies yn 90 oed. Y mis yma mae'n ben-blwydd arbennig ar un arall o ddarllenwyr Y Tafod, sef Marian Llywellyn. Ar ôl cyfnod yn yr ysbyty eleni, mae Marian wedi gwella'n dda a chael cyfle i ddathlu pen-blwydd arbennig mewn o leiaf tri dathliad - gyda'i theulu, gyda'i chyfeillion a gyda'i chyd-aelodau o Bwyllgor Codi Arian Ymchwil Cansyr Tonyrefail. Marian yw ysgrifennydd y pwyllgor hwn ers blynnydoedd mawr. Diolch i chi am eich gwaith pwysig a phen-blwydd hapus oddi wrth ddarllenwyr Tafod Elái.



Marian gyda'i chyfaill Jayne

### Cylch Meithrin Tonyrefail

Mae'r Cylch Meithrin yn ffynnu ac wedi ymestyn ei oriau agor i bum diwrnod yr wythnos. Oherwydd hyn, mae'r sesiwn Ti a Fi wedi newid ei amser i 12.30pm-2.30pm bob dydd Gwener, gyda chinio iach yn cael ei weini am 1pm.

Mae'r staff a'r plant wedi bod wrthi'n brysyr yn codi arian - £30 ar ddiwrnod y Trwynau Coch a dros £200 ar Ddiwrnod Hwyl a Sbrî'r Pasg.

## PONTYPRIDD

Gohebydd Lleol:  
Jayne Rees

### Merched y Wawr

Delyth Rhisiart yw siaradwraig wadd Mis Mai. Dewch i wrando ami yn trafod 'Digartrefedd' yn Ffestri Capel Sardis nos Iau Mai 9fed am 7.30p.m.

Angen cadw'n ystywyth? Fe ddaw Mari Rhys atom unwaith eto i wneud ioga-nos Iau Mehefin 13eg

Oes mwy o fagiâu llaw 'da chi??

### Ciwb Llyfrau

Byddwn yn cwrdd yng Nghlwb y Bont nos Fawrth Mai 14 eg am 8.00p.m. Dewch i drafod y llyfrau Saesneg y buoch yn darllen yn ddiweddar.

Y gyfrol dan sylw ym mis Mehefin yw nofel Gwen Parrott 'Cyw Melyn y Fall'-nos Fawrth Mehefin 18fed am 8.00

### Babi newydd

Ganwyd mab i Rhianydd a'i gwr Nicky- croeso mawr i Jimmy Maguire. Maent yn byw ym Medwas. Llongyfarchiadau hefyd i mangu a thadcu, Gaynor a Trevor Evans, Lanwood Road, Graigwen.



### Llongyfarchiadau

Dymuniadau gorau i Lowri Mared a Marc Real. Priodwyd y ddau yng Nghastell Caerffili ar un o'r diwrnodau oeraf ym Mis Mawrth ond cafwyd diwrnod ardderchog er gwaetha' tywydd. Unig ferch Delyth a Graham Davies, Cilfynydd yw Lowri a mae Marc yn fab i Tony a Chris Real, Tonteg. Brawd Marc, Richard oedd ei was a'r morynion oedd Lowri Mair Jones, Marged Haf Wyatt a Rhian Morgan. Y criw i gyd yn gyn ddisgyblion Rhydfelen a Llanhari. Aethant ar eu mis mel i Wlad yr Ia a maent wedi ymgartrefu yn Grangetown, Caerdydd.

## Y Gymdeithas Wyddonol

Nos Lun, 18fed o Fawrth, daeth Dr Emyr Lloyd-Evans i siarad â ni am ei waith yn adran y Biowyddorau ym Mhrifysgol Caerdydd. Mae e'n gweithio ar lysosomau, rhan o beirianwaith ailgylchu y gell, a'r clefydau sy'n digwydd pan fo nam ar y lysosom. Mae'r grwp yma o tua 50 o glefydau, gan fwyaf yn rhai niwrolegol, yn lled brin, ond efallai y rhai mwyaf enwog yw clefyd Gaucher a chlefyd Niemann-Pick. Esboniodd Emyr sut roedd rhai o'r symptomau o'r clefydau yma yn debyg iawn i glefydau Parkinson a Alzheimers

a sut gallai triniaethau i'r clefydau lysosom fod yn ffordd o ddatblygu ffyrdd o drin y clefydau eraill yma.

Soniodd hefyd am y posibilrwydd o ddatblygu triniaethau i'r diciâu sydd ddim yn dibynnu ar gwrthfotig - testun amserol iawn! Roedd diddordeb mawr gen i glywed am y gwaith a wnaed ar effeithiau llesol y cemegyn circumin sydd yn bresennol yn y sbeis turmeric - cynhwysyn pwysig mewn llawer cyri. Felly mae'n swyddogol, gall cyri fod yn dda i chi!

## CREIGIAU

Gohebydd Lleol:  
Nia Williams  
029 20890979

### Adran Bro Taf

Mae Daniel Jones, Iestyn Jones, Aled Robbins a Josh Morgan wedi bod yn llwyddiannus iawn gyda adran Bro Taf eto eleni. Byddant yn cystadlu yn Eisteddfod yr Urdd, Boncath yn y cystadlaethau dawnsio gwerin grŵp, clocio grŵp, cân actol a grŵp llefaru. Fe dalodd yr holl ymarferion ar eu canfed. Diolch i'r athrawon am eu hamser a'u hymroddiad. Pob lwc bawb! Gwnewch eich gorau a joiwch! Byddwn yn dilyn eich hanes tua'r gorllewin!

### Dr. Catrin Middleton

Llongyfarchiadau gwresog Catrin ar ennill dy ddoethuriaeth o Brifysgol Nottingham. Nid ar chwarae bach daeth y teitl yna i'th ran. Y Dr Middleton cyntaf yn y teulu, ynte? Maes ymchwil Catrin oedd ceisio canfod prawf deïagnostig cynnar i ganer yr afu. Mae bellach yn parhau efo'i hastudiaeth yn Llundain. Gwaith hynod bwysig, hynod ddylanwadol. Pob dymuniad da i ti i'r dyfodol.



### Geni Bryn

Llongyfarchiadau mawr i Alun a Carly Thomas, Llansamlet ar enedigaeth eu babi bach cyntaf! Ganwyd Bryn Lewis Arthur ar 19 Mawrth 2013. Cefnder bach i Casi, Nel, Caitlin a Deiniol. Cliws yn fan'na? Wel - mae e'n wŷr bach i Dr Don a Trish Thomas hefyd - mam-gu a thad-cu balch iawn! Croeso i'r byd Bryn!

### Pen-blwydd priodas ruddem hapus

Llongyfarchion Wynff a Meira ar ddathlu deugain mlynedd o fywyd priodasol ar y 23ain o Ebrill! Llundiau hyfryd ar Facebook - braf gweld y teulu i gyd yn mwynhau'r dathliad!



### Genedigaethau Pentyrch

Llongyfarchiadau i Siân a John ar enedigaeth yr efeilliaid Ela ac Owen, yn gwmni i Nansi fach.

Llongyfarchiadau i Sara ac Aled Davies ar enedigaeth Elis Morgan.



Neuadd y Dref, Llantrisant



## Crys Rhyngwladol Grav yn codi £400 i Ysbyty Plant Cymru




Cafodd Crys Grav ei gyflwyno gan deulu Jim Parcnest ac fe ddywedodd: 'Pan oedd fy mab, Bedwyr, yn ei flwyddyn olaf yn Ysgol Gynradd Y Dderwen, Caerfyrddin, fe ennillodd gystadleuaeth arlunio ar raglen deledu Miri Mawr. Y wobwr oedd y crys rhyngwladol a wisgodd Grav yn ei ail gêm dros Gymru, sef y gêm yn erbyn Lloegr, Chwefror 1975. Daeth Grav i'r stiwdio i gyflwyno'r crys i Bedwyr. Ar ôl gwerthu'r crys yn Eisteddfod Y Mochyn yn Mawrth eleni, dymuniad Bedwyr yw rhoi'r elw i Ysbyty Plant Cymru'.

Codwyd £400 yn yr arwerthiant, ac fe fydd crys Grav yn cael ei arddangos gyda balchder yn ei gartref newydd sef Y Mochyn Du yng Nghaerdydd.

Yn y llun: Huw Llywelyn Davies (Yr Arwerthwr a Llywydd Eisteddfod Y Mochyn Du), Jim Parcnest a Gareth Huws o'r Mochyn Du yn cyflwyno'r siec am £400 i Jasmine Ahearn o Apel Arch Noa / Ysbyty Plant Cymru.

# Clwb Haf



Cynllun Chwarae Gymraeg Gofrestredig AGGCC

**Darparwn amgylchedd diogel, cyffrous a gofalgwr i blant i chwarae trwy gyfrwng y Gymraeg**

I blant dosbarth derbyn i flwyddyn 6



**Campws Gymunedol Garth Olwg, Pentre'r Eglwys**

🕒 9 yb - 5 yp Dydd Llun i Ddydd Gwener

**22ain Gorffennaf 2013 i 16eg Awst 2013**

£15 y dydd  
(neu £65 am wythnos o 5 diwrnod)

*Angen dod a pheycyn bwyd*

**Angen archebu lle**

**Manylion: ☎ 01443 40 75 70 🌐 www.menteriaith.org**

# LLANTRISANT GROESFAEN MEISGYN

Gohebydd y Mis:  
Siân Cadifor

## Cymdeithas Gymraeg Llantrisant.

Erbyn hyn mae dyddiad taith y Gymdeithas i Gaerfyrddin wedi ei benderfynu, sef dydd Sadwrn, Mai'r 11eg. Os hoffech chi ymuno gyda nhw cysylltwch â'ch cynrychiolydd lleol.

## Penblwydd Hapus

Llongyfarchiadau i Alan James, Portreeve Close, Llantrisant, a ddathlodd benblwydd arbennig iawn ddiwedd mis Ebrill!

## Pwll nofio Llantrisant

Mae'r pwll nofio yng Nghanolfan Hamdden Llantrisant wedi ail-agor ers pythefnos, ar ôl cael ei adnewyddu fel rhan o'r gwaith ar y Ganolfan. Mae yna raglen lawn o wersi a gweithgareddau, ar gyfer yr hen a'r ifanc. Hefyd gall teuluoedd a phlant o dan 16 oed gofrestru ar gyfer defnyddio'r pwll yn rhad ac am ddim.

## Gwellhad buan

Dymunwn wellhad buan i Gwenda Voisey o Donysguboriau a dorrodd ei braich dde mewn dau fan wrth gwmpo yn ddiweddar.

## Posteri dwyieithog

Cafodd Geraint Price berswâd o'r diwedd ar Ganolfan Iechyd Maenor Meisgyn i osod posterï gwybodaeth dwyieithog ar draws y Ganolfan. Hoffai i fynychwyr – yn enwedig rhai â phlant sy'n cael gwersi o unrhyw fath yna, wneud pwynt o longyfarch y sefydliad a'r rheolwr ar y posterï Cymraeg, o safbwynt tegwch i'r iaith, ac o safbwynt iechyd a diogelwch. Mae'n diolch yn bersonol i'r rheolwr am wrando o'r diwedd.

## Neuadd y Dref Llantrisant.

Efallai bod rhai o'n darllenwyr wedi clywed cyfweiliad gyda'n hanesydd lleol ni, ac un o Ryddfreinwyr Llantrisant, Dean Powell, ar Radio Cymru yn ddiweddar, lle roedd yn sôn am ddatblygiad diddorol yn yr Hen Dref. Mae gan Ymddiriedolaeth Tref Llantrisant gynlluniau uchelgeisiol gwerth £750,000 i adnewyddu ac adfer yr hen Neuadd y Dref i sut yr edrychai yn wreiddiol, gan greu canolfan i arddangos hanes a threftadaeth y dref.

Cafodd y neuadd ei hail-adeiladu yn 1773 ar seiliau canoloesol, ac ers hynny mae wedi cael ei defnyddio fel llys barn,

# GILFACH GOCH

Gohebydd Lleol:  
Betsi Griffiths

## Gwasanaeth Arbennig

Mae Eglwysi Bedyddwyr Cymraeg Bedyddwyr Dwyrain Morgannwg yn uno bob mis i gynnal Gwasanaeth ar y cyd er mwyn i bobl ddod i adnabod ei gilydd yn well ac er mwyn i'r eglwysi llai gael cynulleidfa

carchar ac ysgol.

Bwriad yr Ymddiriedolaeth, sydd wedi ysgwyddo'r gwaith o ofalu am y neuadd ar ran Rhyddfreinwyr Llantrisant, yw trawsnewid y neuadd i fod yn ganolfan gelfyddydol ac addysgiadol, a all ddenu ymwelwyr i'r dref ac i'r ardal ehangach, yn ogystal â chynnig cyfleusterau i'r trigolion lleol.

Yn ddiweddar derbyniodd yr ymgyrch grant dechreuol o £58,800 gan Gronfa Treftadaeth y Loteri. Bydd y grant datblygu hwn yn helpu tuag at y cam nesaf, sef cyflwyno cais arall am swm o arian sylweddol a fyddai'n galluogi'r Ymddiriedolaeth i ddwyn y maen i'r wal.

## Oes Gafr Eto?

Pan ymgartrefodd tair gafr Gymreig yng nghysgod Twr y Gigfran ar safle Castell Llantrisant y llynedd, nhw oedd y trigolion cyntaf i fyw yno ers saith can mlynedd! Nawr maen nhw wedi dychwelyd i'r Castell am chwe mis, fel rhan o gynllun lleol i glirio a rheoli'r tyfiant o'i amgylch. Mae gan y geifr eu lloches eu hunain ar y safle, ac mae gwirfoddolwyr lleol yn gofalu amdanynt yn ddyddiol, gyda dwr a bwyd ychwanegol. Bwriad Cyngor Rhondda Cynon Taf yw sicrhau bod y castell, lle yr honnir i'r Brenin Edward yr Ail gael ei garcharu, yn llecyn deniadol y gall ymwelwyr a thrigolion lleol ei fwynhau heb or-dyfiant o'i amgylch i'w guddio. Efallai bydd y geifr yn rhan o'r atyniad!

## Gwellhad buan

Ein dymuniadau gorau i Siân Llewelyn Barnes o Feisgyn. Fe fu Siân yn yr ysbyty yn derbyn llawdriniaeth ar ei hysgwydd, ac mae wedi bod yn broses hir a phoenus ers hynny wrth iddi dderbyn therapi cyson. Gobeithio bydd hi'n gwella'n fuan.

## Newyddion mis Mehefin

Anfonwch eich cyfraniadau ar gyfer colofn mis Mehefin at Eurof James – ffriddycwm@tiscali.co.uk

mwy niferus. Tro Moreia Hendreforgan oedd hi, nos Lun Ebrill 16ed, i estyn croeso ac roedd y capel bach bron yn llawn. Y pregethwr oedd y Parch Eifion Wynne Dowlais. Wedi gair gan y Llywydd Beverley Jones, Tabernacl Merthyr, cafwyd gair o groeso ar ran Moreia gan Mair Thomas. Cymerwyd y rhannau arweinïol gan Kath Rickard, Capel Rhondda Trehopcyn, a Rosa Hunt a fydd yn cael ei sefydlu'n weinidog ar Gapel Salem Tonteg Fehefin 8ed. Wedi'r bregeth gan y Parch Eifion Wynne cafwyd y fendith gan Mary Watkins, Heol y Felin Trecynon.

Wedi'r oedfa cafwyd paned a sgwrs a chyfle i siarad â hen gyfeillion ac i ddod i adnabod cyfeillion newydd. Roedd cynrychiolwyr o 15 o gapeli yn y cyfarfod ac edrychwn ymlaen at y cyfarfod nesaf ac i'r Cwrdd Sefydlu yn Salem Tonteg.

## Dathlu 100

Gwnaeth Eva Edwards dathlu ei chanfed penblwydd ar Ebrill 10 gyda theulu a ffrindiau. Mae Eva wedi byw ers rhai blynnydoedd nawr gyda Gwyneth (ei hunig blentyn) yn y Stryd Fawr. Bu Eva yn aelod ffyddlon o Fyddin yr Iachawdwriaeth ac yn mynychu gwasanaethau bob dydd Sul lan hyd nes dwy flynedd yn ôl. Llongyfarchiadau mawr Eva.

## Clwb Rygbi

Gyda'r tymor oer a gwlyb ar fin dod i ben, braf i'ch hysbysu am lwyddiant y tîm ieuentid, enillwyr y cwpan "Merit Table" nos Fercher Ebrill 23 ym Mhenygraig yn erbyn Ystrad Rhondda. Bu'r Ieuentid yn fuddugol o 17 pwynt i 6 mewn gêm hynod o gyffrous.

Mae tîm y menywod wedi cael tymor llwyddiannus gyda 5 o'r chwaraewyr yn aelod o garfan y Gleision ac 1 yn aelod o garfan Dwyrain Cymru. Bu Gemma Hallett (capten tîm menywod Cymru) wrthi yn ddiweddar yn cynnal sesiwn hyfforddi.

Mae'r tîm cyntaf, ar hyn o bryd yn y 6ed safle yng nghyngrair 1 y Dwyrain gyda 3 gêm ar ôl i chwarae– digon dymunol wrth ystyried fod y chwaraewyr yn brin oherwydd anafiadau ac oblygiadau gwaith. Gobeithio bydd digon o'r ieuentid dawnus ar gael tymor nesaf i ymuno.

## Bethlehem, Gwaelod-y-garth

**Trefn yr Oedfaon** (ar y Sul am 10:30 a.m. oni nodir yn wahanol) :

### Mis Mai 2013

5ed Oedfa Ardal – Aelodau Radyr  
12fed Oedfa Gymun - Parchedig R. Alun Evans (Gweinidog)  
19eg Oedfa Cymorth Cristnogol  
26ain Parchedig R. Alun Evans (Gweinidog)

### Mis Mehefin 2013

2il Parchedig Aled Edwards  
9fed Oedfa Gymun - Parchedig R. Alun Evans (Gweinidog)  
16eg Parchedig Dewi Myrddin Hughes  
23ain Parchedig R. Alun Evans (Gweinidog)  
30ain Parchedig Derwyn Morris Jones

“Daw haul a’i hud-wialen” ym mis Mai yn ol T Arfon Williams, ond i ni ym Methlehem, ac mewn llawer Bethlehem arall ar hyd a lled Cymru, mis Cymorth Cristnogol ydi mis Mai yn ddiwahan. A fydd eleni’n ddim gwahanol.

Bydd criw o’r aelodau yn crwydro strydoedd Gwaelod-y-garth yn dosbarthu (gwaith gweddol hawdd), a chasglu (ddim mor hawdd) amlenni Cymorth Cristnogol, gan ofyn yn garedig i’r trigolion a ydynt yn dymuno cefnogi ymdrechion diflino’r elusen i greu cymdeithas decach i bawb trwy’r byd i gyd.

Mae’r ymateb ar stepan y drws yn gallu bod yn gymysglyd iawn, rhai wrth reswm wedi paratoi, a’r amlen yn llawn ac wedi ei selio’n barod, eraill yn awgrymu nad oes newid ganddynt, rhai yn gwrthod a rhai yn gwrthod hyd yn oed agor y drws!

Ond dal ati o flwyddyn i flwyddyn fydd hanes y casglwyr, gan sicrhau fod y neges yn cael ei hail-adrodd, a wyneb cyhoeddus Bethlehem yr un mor daer beth bynnag yr ymateb.

Cynhelir Oedfa Cymorth Cristnogol Sul y 19eg o Fai, a byddwn bryd hynny yn dilyn oedfa a fydd yn cael ei rhannu ar draws Cymru benbaladr.

Mae’n fwiad hefyd cynnal Bore Coffi yn y Festri fore Sadwrn y 25ain o Fai (rhwyng 10 a 12 o’r gloch), er budd Cymorth Cristnogol, gan ddefnyddio hynny i agor y drws i’r pentrefwyr sydd yn ymwybodol o’r adeilad ond heb erioed deimlo’r gwres sydd o’i fewn.

Fel arfer, ar adegau o ofyn, mae Bethlehem a’i haelodau eisioes wedi ymateb i Apel Syria Cymorth Cristnogol gan obeithio y bydd clustiau’r gwleidyddion yn clywed y gri am gymorth, a’r dyhead i roi terfyn ar yr ymladd a’r lladd sy’n dinistrio cymdeithas a gwareiddiad.

## TONTEG

Gohebydd Lleol:  
Gill Williams

### Genedigaeth wŷr bach

Croeso mawr i Elis Morgan, mab bach Aled a Sara Davies sy’n byw yn Nhreganna ond yn hannu o Donteg a Phentyrch. Ganed Elis, ddydd sul, Ebrill 14eg a phawb yn gwneud yn dda. Llongyfarchiadau i’r rhieni balch, ac wrth gwrs i Elwyn a Carys, Y Dell, (a Gwyneth, Pentyrch) ar ddod yn nain a dadcu (a mamgu) am y tro cyntaf, maent ar ben eu digon.

Yn ystod y mis hefyd bydd Holiadur yn cael ei ddsbarthu i’r aelodau i ofyn am eu barn ynglyn ac addoli ym Methlehem. Awgrym y Gweithgor Addoli oedd hyn, gan geisio sicrhau fod awgrymiadau am le’r plant a’r bobl ifanc, yn ogystal â’r aelodau hŷn yn yr oedfaon yn cael eu hystyried.

Bydd yr Holiadur yn gofyn barn am y defnydd o’r dechnoleg ddiweddaraf mewn oedfa, awgrym sut i wella gwefan y capel, parodrwydd i fod o gymorth gyda gwahanol weithgareddau, ac hefyd sut mae estyn llaw i gymell mwy o drigolion y Gwaelod i gynnwys y capel fel rhan o’u cylchoedd a’u pentref.

Bydd yn sicr yn ddiddorol cael adborth o’r fath wrth baratoi i symyd ymlaen i bennod newydd arall yn hanes Bethlehem.

Daeth tymor arall yn hanes “Drws Agored” i ben yn ystod mis Ebrill, a phawb wedi mwynhau trin a thrafod Waldo, ac wedi dod i’w adnabod dipyn yn well ers mis Medi diwethaf. O fis Medi nesaf ymlaen bydd “Drws Agored” yn dilyn gwaith Ann Griffiths ac eraill o emynwyr Cymru (gan roi pwyslais efallai ar y merched eraill fu’n cyfansoddi emynau?).

Os oes chwant troi i mewn i oedfa rhywbryd yn y dyfodol, bydd croeso yn eich disgwyl bob amser ym Methlehem, Gwaelod-y-garth. Cofiwch y cynhelir Ysgol Sul i’r plant bob Sul heblaw am wyliau Ysgol a hynny i gyd fynd ac amser yr oedfa am 10:30 a.m.

Cofiwch hefyd am wefan Bethlehem sydd i’w chanfod ar [www.gwe-bethlehem.org](http://www.gwe-bethlehem.org) Ymwelwch yn gyson â’r safle i chwi gael y newyddion diweddaraf am hynt a helynt yr eglwys a’i phobl. Hefyd mae gan Bethlehem gyfri trydar (twitter). Dilynwch ni ar @gwebethlehem.

## PENTYRCH

Gohebydd Lleol:  
Marian Wynne

### Clwb y Dwrllyn

Frank Lincoln oedd y siaradwr yng nghyfarfod mis Ebrill, Clwb y Dwrllyn a daeth tyrfa gref i wrando arno. Gan dynnu ar ei brofiad hir ym myd darlledu, ei waith fel cyflwynydd cyngherddau, a’i wybodaeth eang o fyd yr opera, soniodd am rai troeon trwstan yn y meysydd yma. Yn gymysg â’r straeon cafwyd cyfle hefyd i wrando ar rai o’i hoff gantorion gyda gair neu ddau am gefndir pob un. Diolch yn fawr Frank am noson o ddiddanwch pur.

### Penblwydd Hapus

Llongyfarchiadau i Dewi Hughes ar ddathlu penblwydd arbennig yn ddiweddar. ‘Roedd y deisen a dderbyniodd yn gampwaith, yn adlewyrchu diddordeb Dewi mewn cerdded a dringo’r mynyddoedd.

### Genedigaethau

Llongyfarchiadau i Siân a John ar enedigaeth yr efeilliaid Ela ac Owen, yn gwmni i Nansi fach. Mae Nain a Tad-cu, Gwyneth a John Williams yn mynd i fod yn brysur iawn.

Llongyfarchiadau hefyd i Sara ac Aled Davies ar enedigaeth Elis Morgan, wŷr cyntaf i Gwyneth Lewis, Pentyrch a Carys ac Elwyn Davies, Tonteg.

### Priodasau Ruddem

Fel y gwelwch mae sawl pâr wedi mwynhau dathlu deugain mlynedd o fywyd priodasol yn ddiweddar.

Aeth Yvonne a Gareth Williams ar daith i Awstralia i ddathlu eu priodas ruddem cyn dod nôl i gyd –ddathlu gyda’r teulu ym Mhortiwal.

Mae’n siwr i Judith a Ken Evans gael amser da yn ninas rhamantus Paris wrth iddynt hwythau ddathlu a dihangodd Carol a Penri Williams rhag yr oerfel i fwynhau’r haul a dathlu yn Gran Canaria.

Llongyfarchiadau iddynt i gyd.

### Merched y Wawr

Un o brosiectau Gill Griffiths, y llywydd cenedlaethol, yw rhoi cyfleoedd i ddysgwyr Cymraeg ymarfer mewn sefyllfa anffurfiol a dyna a ddigwyddodd yng nghyfarfod Merched y Wawr ym Methlehem, Gwaelod y Garth, ym mis Ebrill. ‘Roedd criw da o ddysgwyr, eu hathrawon ac aelodau Merched y Wawr wedi dod at ei gilydd i sgwrsio dros baned a bara brith. Yn ogystal clywsom am yr ymgyrch i sefydlu canolfan gymunedol Gymraeg y Mimosa yn Y Barri gan Kay Holder, enillydd dysgwr y flwyddyn 2011. Felly, os ydych yn Y Barri, galwch yno am baned a sgwrs.

## Ysgol Gynradd Gymunedol Gymraeg Llantrisant

### Trip Blwyddyn 2

Aeth disgyblion o Flwyddyn 2 i Ganolfan Addysgiadol Cilfynydd ym mis Chwefror. Bu'r plant yn mwynhau bod yn yr awyr agored yn chwilota! Buont yn dysgu am bwysigrwydd ailgylchu ac arbed dŵr a'r modd y gallant hwy helpu yn y tŷ ac yn yr ysgol. Da iawn chi!

### Trip Blynyddoedd Cynnar y Cyfnod Sylfaen

Gan mai'r thema yn y Cyfnod Sylfaen y tymor hwn yw 'Cymru', aeth disgyblion Blynyddoedd Cynnar y Cyfnod Sylfaen ar driip i Sain Ffagan. Roedd hi'n ddiwrnod braf gyda phob un yn mwynhau ymdrochi ei hunan yn ein hanes ni. Braf oedd gweld y plant yn cwestiynu'r rhai a fu'n gweithio yn Sain Ffagan yn synhwyrol ac yn gwrtais.

### Ymweliad PC Jones

Bu P.C. Siân Jones yn ymweld â'r ysgol i drafod gwahanol bethau gyda disgyblion o'r Cyfnod Sylfaen. Gwrandawodd y plant o'r dosbarthiadau Meithrin a'r Derbyn yn astud arni wrth iddi gyflwyno y math o waith y mae'r heddlu yn ei wneud. Caswant gyfle i wisgo gwahanol ddillad ac hetiau – un neu ddau o'r plant yn awyddus i fod yn blismon neu'n blismones pan yn hŷn!

### Trip Blwyddyn 6 i'r Eglwys

Er mwyn dysgu mwy am stori'r Pasg, aeth disgyblion o Flwyddyn 6 i Eglwys Bethel ym Mhontyclun. Cawsant gyfle i weld pobl yn actio rhannau'r stori a bu'r profiad yn un gwerth chweil gyda phob un yn mwynhau ac wedi elwa o'r profiad.

### Eisteddfod

Er mwyn dathlu Dydd Gŵyl Dewi cynhaliwyd Eisteddfod yr ysgol yn ogystal â gwneud amrywiol weithgareddau yn seiliedig arni yn ystod yr wythnos. Llongyfarchiadau mawr i bob un a gymrodd rhan yn ein hesitddfod ysgol ar Fawrth 1af. Cafwyd diwrnod o fwynhau gyda rhai yn adrodd, canu a dawnsio. Aeth y rhai a fu'n fuddugol i Ysgol Llanhari i gystadlu yn yr Eisteddfod Gylch. Wedi bore o gystadlu brwd, daeth pob un nôl i'r ysgol yn gyffrous i rannu eu newyddion da eu bod nhw'n mynd i'r Eisteddfod Sir ym Mhorthcawl. Ym Mhorthcawl, diddanodd y disgyblion y gynulleidfa a'r beirniad yn yr Eisteddfod Sir ac o ganlyniad maent wedi llwyddo mewn sawl cystadleuaeth i gyrraedd Eisteddfod yr Urdd yn Sir

## Adran Chwaraeon yr Urdd

Helenw@urdd.org  
0797600 3358

Mae gan adran chwaraeon yr Urdd nifer o glybiau cymunedol, sydd yn rhedeg yn ardal Taf. Mae croeso i unrhyw un fynychu'r clybiau yma i gadw'n heini, gwneud ffrindiau newydd a chymdeithasu trwy gyfrwng y Gymraeg:

### Gymnasteg yn Ysgol Garth Olwg

Bob Nos Iau

4yp-4.45yp: derbyn i flwyddyn 1  
4.45yp tan 5.45yp: blwyddyn 2 i 5  
Pris £2.50

### Tenis

Ym Mharc Pontypridd bob nos Lun  
5.30yp tan 6.30yp Blwyddyn 3- 6

Ac hefyd ar gyrtiau Tennis Fynnon Daf  
Bob Nos Fawrth

5yp - 6yp Blwyddyn 3-6 Pris £2.50

### Aml Gamp - Cymysgedd o wahanol chwaraeon

Trefforest bob nos Iau 5yp tan 6yp  
Blwyddyn 1-4 Pris £2

### Athletau

Ysgol Uwchradd Garth Olwg  
Bob nos Fercher 4.45 tan 5.45,  
Blwyddyn 3-6 Pris £2

### Plantos Heini Taf

I Blant 0-4 oed. Clwb wythnosol i hybu datblygiad corfforol eich plentyn a magu hyder mewn awyrgylch gyfeillgar. £3 y sesiwn. Rhaid i rieni aros gyda'r plant.

Yn Gym Fusion, Pontyclun

Pob bore Iau 10yb tan 11.30. Pris £3

## Llwyddiant ysgubol Cwmni Selsig

Llongyfarchiadau fil i \*Dale Evans a'i gyd-aelodau o gast y sioe gerdd 'Jekyll & Hyde' a berfformiwyd gydag angerdd ar lwyfan theatr y Parc a Dâr dros wythnos ola mis Ebrill. Cynhyrchiad ardderchog - cystal os nad gwell nag unrhyw sioe gaech chi ar lwyfannau'r West End! Dale oedd y Cyfarwyddwr Cerdd ond yn ogystal roedd ganddo ran amlwg - sef Simon Stride - yn y cynhyrchiad. Do'n i erioed wedi gweld y sioe ar lwyfan o'r blaen - er yn gyfarwydd â rhai o'r caneuon - megis 'Take me as I am' a 'Once upon a dream' a'r enwog 'This is the moment' felly roedd yn brofiad gwych clywed y caneuon yn eu cyd-destun.

Sefydlwyd Cwmni Selsig 'nôl ym 1948 gan garedigion cerdd a drama top y Rhondda. Fe'i ffurfiwyd yn ardal Blaenrhondda ac fe benderfynwyd ar yr enw 'Selsig' - (dim byd i wneud â seosejs fel y sicrhaodd Dale fi!) oherwydd bod yna afonig fechan yn yr ardal o'r enw Glanselsig, yng Nghwm Selsig ger Craig Selsig! Tybed all rhywun fy ngoleuo ar darddiad yr enw? Pob llwyddiant i'r Cwmni yn y dyfodol ac os fethoch chi gyfle i fwynhau'r sioe yma gellwch ymweld â gwefan y Cwmni - [www.selsig.net](http://www.selsig.net) - neu eu dilyn ar Facebook er mwyn dal y cynhyrchiad nesa a'i brofi pytiau o holl berfformiadau'r gorffennol.

\*Dale - uwch athro yn ysgol gynradd Treorci - ond wedi treulio tri mis ar gwr Sabothol yn dysgu Cymraeg ym Mhrifysgol Morgannwg y Gwanwyn yma - a bellach yn Gymro i'r carn - werth ei glywed yn siarad Cymraeg. Llongyfarchiadau!

Benfro. Dymunwn pob hwyl i bawb!

### Myfyrwyr newydd

Croeso mawr i'n myfyrwyr newydd. Bydd Miss Enfys Owen yn Nosbarth 3 yn addysgu plant Derbyn, bydd Miss Angharad Wright yn Nosbarth 4 yn addysgu plant Derbyn a Blwyddyn 1 a bydd Mr Zack Williams yn addysgu Blwyddyn 4. Pob hwyl i'r tri ohonynt a gobeithio y byddant yn mwynhau eu hamser yn yr ysgol.

### Trawsgwlad

Llongyfarchiadau mawr i dîm trawsgwlad yr ysgol fu'n cystadlu yn Llanhari ddechrau mis Ebrill. Da iawn i chi gyd! Dyma ganlyniadau y gystadleuaeth tîm. Blynyddoedd 3 a 4 ~ Tîm y bechgyn yn 1af. Tîm y merched yn 2il  
Blwyddyn 5 ~ Tîm y bechgyn yn 1af.  
Tîm y merched yn 2il  
Blwyddyn 6 ~ Tîm y bechgyn yn 2il. Tîm

y merched yn 1af.

Dyma ganlyniadau cystadlaethau yr unigolion.

Blynyddoedd 3 a 4 Bechgyn

1af ~ Jack Clay. 2il ~ Tomi Booth.

3ydd ~ Gruff Morgan

Blwyddyn 5 Bechgyn

1af ~ Gethin Evans 2il ~ Dylan Edwards

3ydd ~ Siôn Pari

Blwyddyn 5 Merched

3ydd ~ Ela Porter

Blwyddyn 6 Bechgyn

3ydd ~ Rhys Morgan

Blwyddyn 6 Merched

1af ~ Lili Gaskin

3ydd ~ Grace Daunter

## Ysgol Dolau

### Pêl-rwyd

Daeth Ysgol Gynradd Garth Olwg i chwarae sawl gêm gyfeillgar ar Fawrth 5ed. Roedd timoedd cymysg o ddisgyblion Blynnydoedd 3,4,5 a 6, gyda llawer yn chwarae mewn safleoedd newydd. Roedd hi'n hwyll i ymarfer ein sgiliau. Diolch yn fawr i chwaraewyr Garth Olwg a oedd yn hyfryd ac oedd yn dangos potensial enfawr.

### Diwrnod Y Trwynau Coch

Penderfynodd Cyngor yr Ysgol i bawb wisgo rhywbeth coch ar gyfer Diwrnod y Trwynau Coch eleni. Talodd y disgyblion £1 am wneud. Roedd stondin gacennau gan Ddosbarth 7 yn ystod amser chwarae a oedd yn llwyddiannus dros ben. Codwyd dros £530! Diolch enfawr i bawb a gyfrannodd.

### Bant Â Ni !

Cafodd disgyblion y ddwy Adran yn y Cyfnod Sylfaen ddiwrnod i'r brenin ar Chwefror yr 8fed, wrth wisgo eu dillad gwyliau, pacio eu bagiau a 'hedfan' ar eu taith. Roedd pawb wedi creu pasbort, labeli teithio a thocynnau hedfan yn barod i hedfan i'r gwledydd yr oeddent wedi eu hastudio yn ystod y tymor. Aeth plant Meithrin a Derbyn i'r Alban ac Awstralia, a Blynnydoedd 1 a 2 i'r Aiff. Trawsnewidiwyd y Gampfa i Lolfa Ymadael, ac roedd Capten Evans wrth ei fodd yn cyhoeddi'r ymadawiadau dros uchelseinydd yr ysgol. Stampiwyd pob pasbort gan Mrs. Webb cyn mynd i'r efelychydd hedfan yn y neuadd. Roedd staff wrth law i weini byrbrydau a diodydd yn ystod y daith. Glaniodd bob awyren yn ddiogel ar ôl teithiau bendigedig a diwrnod i gofio!

### Pythefnos Masnach Deg

Cawsom amryw o weithgareddau i godi ymwybyddiaeth o Fasnach Deg yn ddiweddar, gan gynnwys blasu gwahanol fwydydd, Helfa Fwyd, Bore Coffi, a gwerthu nwyddau Masnach Deg amrywiol. Roedd y Cynghorau Eco a Masnach Deg wedi llwyddo i godi dros £550 dros y pythefnos, ac roedd pawb wedi dysgu llawer am effeithiau Masnach Deg ar y ffermwyr a thyfwyr dros y byd. Diolch i bawb a gyfrannodd. Rydyn ni'n edrych ymlaen at y flwyddyn nesaf yn barod.

### Eisteddfod Ysgol

Bu dathliadau Dydd Gŵyl Dewi ddydd Gwener, Mawrth y 1af. Roedd canu hyfryd gan bawb. Roedd eitemau amrywiol yn ystod y dydd gan gynnwys Blwyddyn 1 yn rhoi sioe o ddawnsio gwerin, Charlotte Kwok yn swyno pawb wrth y piano, Cameron Coburn yn llefaru'r darn 'Y Bensel Hud', grŵp

dawnsio creadigol a dawns disgo unigol gan Ellie Rees.

Roedd tystysgrifau wedi cael eu dosbarthu am ymdrechion llawysgrifen a chelf a chrefft y plant. Roedd y seremoni coroni yn hyfryd – Cerys Lloyd enillodd y Gadair ac Ethan Roberts enillodd y Goron. Llonyfarchiadau i'r ddau ohonynt!

### Eisteddfod Gylch

Ddydd Mercher 6ed Mawrth, roedd ein Heisteddfod Gylch yn Llanhari. Roedd Cameron Coburn, Blwyddyn 3 a Dyfan Krieger, Blwyddyn 4 wedi llefaru 'Y Bensel Hud'. Roedd Charlotte Kwok, Blwyddyn 2 wedi perfformio ac ennill yr unawd piano. Enillodd y grŵp dawnsio disgo. Llonyfarchiadau mawr i bawb a phob lwc yn y rownd nesaf!

Mae'r grŵp creadigol hefyd yn cystadlu yn yr Eisteddfod Sir, ynghyd ag Ellie Rees, sydd yn dawnsio disgo yn unigol. Pob lwc i bawb!

### Rygbi

Ar ddiwrnod rhewllyd ym mis Chwefror cystadlodd ein tîm rygbi yn erbyn 8 o ysgolion eraill yng nghystadlaethau blynnyddol Ysgolion Pontypridd, yn y Bad Uchaf. Yn dilyn gemau cystadleuol tu hwnt, gan gynnwys curo Heol y Celyn 31-0 yn y rownd gynderfynol, bydd Dolau yn chwarae yn y rownd derfynol i'r Plât yn erbyn Gwaun Celyn. Bydd rownd derfynol y Cwpan rhwng Castellau a Phontyclun. Llonyfarchiadau a phob lwc i bawb.

### Gwobr NAACE y 3ydd Mileniwm

Yn ddiweddar rydyn ni wedi ennill Gwobr Naace 'Dysgu yn y 3ydd Mileniwm' am ein defnydd arloesol o dechnoleg er mwyn codi safonau dysgu ac addysgu trwy gydol yr ysgol. Ni yw'r ysgol gyntaf yn Rhondda Cynon Tâf i ennill y wobwr, ac yn un o ddim ond 6 trwy Gymru gyfan i dderbyn y wobwr gyda chymeradwyaeth arbennig. Cyflwynwyd y Wobr i'r ysgol o flaen cynulleidfa enfawr a brwdfrydig yn Sioe BETT yn Llundain ym mis Ionawr. Mae Ysgol Gynradd Dolau nawr yn un o ddim ond 70 ysgol ym Mhrydain a thu hwnt i dderbyn y wobwr!

### Athletau

Cymerodd Blynnydoedd 3, 4 a 5 ran mewn gŵyl atletau yn y Ddraenen Wen a Chanolfan Hamdden Tonyrefail ddydd Mawrth a dydd Mercher, Mawrth 19eg a 20fed. Roedd eu hagwedd, brwdfrydedd a'u hysbryd tîm yn wych wrth ymuno yn y rasys cyfnewid, naid hir, gwaywffon, a sgiliau cryfder a buanedd. Edrychwch allan amdanynt yng Ngemau'r Olympaidd yn 2024!

### Tacluso Llanharan

Roedden ni wedi cael llond ein boliau o'r holl sbwriel oedd wedi'i wasgaru o amgylch pentre' Llanharan, felly trefnom ni gasglu'r sbwriel ein hunain.

## PENTRE'R EGLWYS

Gohebydd Lleol:  
Emma Thompson

### Gorymdaith i Godi Arian

Da iawn i bawb a chymerodd rhan yn orymdaith o gwmpas Pentre'r Eglwys ar fore Sul y 24ain o fis Mawrth. Fe wnaeth bron 200 cymeryd rhan, ar fore ofnadwy o oer, i godi arian i Sefydliad Aren Cymru.

### Traffig yn y Pentref

Mae nifer o bryderon gan drigolion lleol ynglŷn â'r cynnydd mewn traffig peryglus yn Llanilltud Faerdref. Mae Steven Owen a Ioan Bellin, wedi bod yn trefnu deiseb i gael mesurau tawelu traffig ar Ffordd Llantrisant a'r Stryd Fawr.

O bron i 30 o gamerâu cyflymder yn RhCT dim ond un camera statig sydd yna ar hyd y ffordd yma, ar Stryd St Illyd, sydd ddim ar y Stryd Fawr ei hunan. Mae'r ddeiseb yn gofyn am gamera cyflymder statig parhaol ar y ffordd, mae'n debyg wrth ymyl Ysgol Garth Olwg ac efallai gweld mwy o arwyddion rhybudd ar hyd y ffordd.

Os ydych chi'n byw ar, neu ar bwys, y Stryd Fawr ac efo unrhyw sylwadau, eisiau arwyddo'r ddeiseb neu eisiau rhagor o wybodaeth, yna cysylltwch gyda Steven Owen trwy anfon ebost at [owain33@sky.com](mailto:owain33@sky.com).

### O'r Awyr

Os am weld Pentre'r Eglwys fel yr oedd yn 1930 mae wefan Prydain oddi Fry yn cyflwyno casgliad diddorol o Aerofilms o awyluniau o 1919 hyd at 1953. Allwch weld yr ardal fel yr oedd efo gorsaf tren a chyn adeiladu yr hen Ysbyty Dwyrain Morgannwg.

[www.britainfromabove.org.uk/cy](http://www.britainfromabove.org.uk/cy)

Ar ddiwrnodau gwlyb a gwyntog iawn, gwisgodd disgyblion Blynnydoedd 3 a 4, eu rhieni a staff cyn mynd ati i dargedu gwahanol ardaloedd o amgylch y pentre' gan gynnwys Parc Chwarae'r Ganolfan Gymunedol a'r ardal parcio, parc chwarae Plas Trenos, Parc Chwarae Canolfan Hamdden Llanharan a thir ein hysgol. Rydyn ni'n wir obeithio y bydd ein hymdrechion yn dylanwadu ar eraill i gael gwared a'u sbwriel yn synhwyrol.

### Swap It Day!

Cafodd ddisgyblion CA 2 gyfle i gyfnewid eitemau diangen – naill ai rhai doedden nhw ddim eu heisiau rhagor neu doedden nhw ddim yn defnyddio. Roedd cyfle i gyfnewid am rywbeth arall, gan ddeall bod dim troi nôl wedyn! Roedd hi'n weithgaredd llwyddiannus a chyfle gwych i ail-ddefnyddio pethau.

## EFAIL ISAF

Gohebydd Lleol:  
Loreen Williams

### Pen-blwydd

Llongyfarchion gwresog i Cliff Hewitt, Penywaun a ddathlodd ben-blwydd arbennig iawn yn ystod mis Ebrill.

### Yn yr Ysbyty

Bu John Jones, Nant-y-felin yn yr ysbyty eto yn ddiweddar yn derbyn triniaeth. Bregus iawn mae iechyd John a'i wraig Audrey wedi bod yn ddiweddar. Dymunwn adferiad iechyd buan iddynt.

### Marathon Llundain

Llongyfarchiadau mawr i Hefin Gruffydd, Nantcelyn ar ei orchest yn rhedeg Marathon Llundain ar ei gynnig cyntaf. Cwblhaodd y dasg mewn amser da iawn o dair awr 38 munud, gan godi swm o arian teilwng iawn i'r elusen Dolen Cymru.

### Y TABERNAACL

#### Genedigaethau

Llongyfarchiadau i Trish a Don Thomas ar ddod yn fam-gu a thad-cu unwaith eto. Ganwyd mab bach, Bryn Lewis Arthur i Alun a Carly.

Llongyfarchion i Carys ac Elwyn Davies, Tonteg ar eu statws newydd yn Nain a Thad-cu i Elis Morgan, mab bach cyntaf i Aled a Sara.

### Merched y Capel

Fore Mawrth, Ebrill 16eg fe deithiodd nifer fach o'r Merched i Amgueddfa Pontypridd gerllaw'r hen bont enwog. Cawsom ein croesawu gan Mr Brian Davies ac fe eglurodd fod yr amgueddfa wedi ei lleoli yn hen gapel y Tabernacl. Roedd nenfwd yr adeilad yn eithriadol o brydferth a'r organ bib hardd yn dal i gael ei chwarae mewn cyngherddau achlysurol. Mae'r amgueddfa yn llawn creiriau a lluniau sy'n portreadu hanes y dref a'r ardaloedd cyfagos. Tywyswyd ni wedyn i weld yr hen bont a adeiladwyd gan William Edwards yn y ddeunawfed ganrif. Cafodd bedwar cynnig ar y dasg o'i hadeiladu gan i'r ddwy bont gyntaf gael eu dinistrio gan lifogydd. Cwmpodd y drydedd bont dan ei phwysau'i hun. Fe ymlwybron ni wedyn i Barc Ynysangharad, Parc a grëwyd yn gofeb ar ôl y Rhyfel Byd Cyntaf. Soniodd Brian am waith enwog Cwmni Brown Lenox a oedd gerllaw'r parc. Gwaith creu cadwyni a sefydlwyd yn 1818 a gynhyrchodd gadwyni haearn gorau'r byd ar gyfer angori llongau. Daeth ein taith i ben gerllaw Cofeb Evan James a James James, cyfansoddwr ein Hanthem Genedlaethol. Gwaith y cerflunydd William Goscombe John yw'r gofeb a chafodd ei gosod yn y Parc yn 1930.



### Arddangosfa ffotograffau – 'Menter Iaith Rhondda Cynon Taf mewn llun'



Ydych chi am wybod mwy am waith a gwasanaethau Menter Iaith Rhondda Cynon Taf neu â diddordeb yn yr iaith Gymraeg a phwysigrwydd defnyddio'r Gymraeg yn y gymuned?

Dewch lawr i Ganolfan Dysgu Gydol Oes Garth Olwg rhwng Mai 13eg – Mehefin 31ain lle fydd arddangosfa o ffotograffau'r Fenter dros y blynyddoedd diwethaf yn y galeri yn y prif fynedfa.

Cyfle gwych i chi gael cip olwg ar waith gwerthfawr yr elusen.

Llawr Cyntaf, 9 Y Stryd Fawr,  
Pontypridd. CF37 1QJ  
01443 407570

[www.menteriaith.org](http://www.menteriaith.org)

### Sesiynau Stori a Chreu i blant yn y Gymraeg! – Hanner tymor mis Mai 2013 – AM DDIM!

Os ydych chi'n edrych am rywbeth gwahanol i wneud dros wyliau hanner tymor dewch i wrando ar stori a gwneud ychydig o gelf a chrefft yng nghwmni staff Menter Iaith Rhondda Cynon Taf.

Cyfle i blant ddefnyddio'r iaith Gymraeg tu allan i'r ystafell ddosbarth a chreu rhywbeth arbennig i fynd adref!

Gweler lleoliadau, dyddiadau ac amseroedd sesiynau llyfrgelloedd yr ardal yma isod.

(\*Mae'r sesiynau yma yn addas i blant oed Cynradd – Croeso i baw! – Rhaid i bob plentyn ddod gyda oedolyn)

Am fwy o fanylion cysylltwch â Catrin Reynolds (Swyddog Gweithgareddau Teuluol Menter Iaith Rhondda Cynon Taf ar 01443 407570 neu e-bostiwrch:

[catrinreynolds@menteriaith.org](mailto:catrinreynolds@menteriaith.org)

Llyfrgell Pentre'r Eglwys	Dydd Mawrth, Mai 28ain	11:00-12:00yp
	*Oherwydd diffyg lle a galw uchel bydd rhaid ffonio swyddfa'r Fenter i fwcio lle yn y Llyfrgell yma'n unig Swyddfa: 01443 40757	
Llyfrgell Aberdâr	Dydd Mercher, Mai 29ain	11:00-12:00yp
Llyfrgell Treorci	Dydd Iau, Mai 30ain	11:00-12:00yp
Llyfrgell Hirwaun	Dydd Iau, Mai 30ain	2:30-3:30yp
Llyfrgell Pontyclun	Dydd Gwener, 31ain	11:00-12:00yp

## Sialens Kilimanjaro - 20fed - 29ain o Fedi, 2013

Cynhaliwyd noson wych yng Ngwesty'r Village, Caerdydd yr ail ar bymtheg o Ebrill lle daeth tua 200 o bobol ynghyd i wrando ar Iolo Williams yn traddodi ar Fywyd Gwyllt Cymru. Rhan o ymgyrch

Ein taith nesaf fydd ymweliad â Phenrhys yn y Rhondda ddydd Llun, Mai 13eg a bydd Cennard Davies wrth law i'n tywys a'n goleuo am hanes yr ardal.

### Cyngerdd

Cynhelir cyngerdd yng Nghapel y Tabernacl nos Fawrth, Ebrill 30ain am hanner awr wedi saith. Cymerir rhan gan Ysgol Gynradd Castellau, Ysgol Gynradd Maes y bryn a Chôr y Einion. Cyflwynir elw'r gyngerdd i gronfa leol Cymorth Cristnogol.

### Trefn yr Oedfaon ar gyfer mis Mai.

Mai 5ed. Oedfa Gymun o dan ofal ein Gweinidog.

Mai 12fed. Oedfa Cymorth Cristnogol.

Mai 19eg. Elenid Jones.

Mai 26ain. Allan James.

codi arian Iolo, Shân Cothi a Cheryl Jones oedd y noson - codi arian ar gyfer ymchwil cancr. Ond nid trwy ddarlithio a gwerthu tocynnau raffl y bydd y glewion yma yn codi pres - o'u blaenau mae sialens aruthrol. Byddant yn rhan o grwp o ddringwyr glew fydd yn tacllo Mynydd Kilimanjaro yn Nghanania fis Medi eleni er mwyn codi ymwybyddiaeth o waith diflino ysbyty Felindre, Caerdydd. Codi ymwybyddiaeth a chodi arian wrth gwrs. Os am gefnogi gellwch ymweld â gwefan ysbyty Felindre sef

[www.velindrefundraising.com/trekofalifetime](http://www.velindrefundraising.com/trekofalifetime) neu i gefnogi tîm Shân sy'n casglu arian er mwyn hyrwyddo'r ymchwil i ganer y pancreas - yr elusen amserjustintime - trwy ymweld â [www.justgiving.com/Kili-Angels](http://www.justgiving.com/Kili-Angels)

Diolch Iolo am noson arbennig o gofiadwy. Dewisodd rhyw ugain o sleidiau - lluniau o'i hoff blanhigion, hoff greaduriaid, hoff adar ac fe gawson berlau wrth iddo adrodd straeon am ei brofiadau a rhannu o'i wybodaeth faith. Pob lwc ar y daith - pob lwc gyda chodi arian! Dewch yn ôl yn saff i adrodd yr hanes!

## Newyddion o Acapela

Mae nifer o gyngherddau wedi'u trefnu yn ystod mis Mai a Mehefin. Mae tocynnau ar gael o Acapela neu gan staff 'Meddygfa Pentyrch' sydd yma rhwng 8.30-10 bob bore Llun-Gwener. Byddai'n braf gweld trigolion yr ardal yn mynychu'r digwyddiadau. Os oes grwpiau o 6 neu fwy eisiau dod i un o'r nosweithiau cysylltwch ag Acapela.

Nos Sul Mai 12eg, 7.30 - Acapela, Pentyrch

Al Lewis - Dewch i fwynhau noson yng nghwmni Al Lewis a'r band.

Tocynnau ar gael o'r wefan, [www.acapela.co.uk](http://www.acapela.co.uk) neu am ddim i bobl sy'n mynd i weld Al Lewis yn y 'Glee Club' Caerdydd (Ebrill 29ain) Cyfle hefyd i glywed 'Ellie Makes Music' yn lansio ei sengl newydd yn ystod y noson.



Nos Wener Mai 24ain, 7.30 - Acapela, Pentyrch, CF15 9QD Rhys Taylor a'i 'RT Dixieband' - Dewch i fwynhau noson o



gerddoriaeth Dixieland yng nghwmni Rhys Taylor a'i RT Dixieband. Diben yr 'RT Dixieband' yw dechrau band jazz traddodiadol sy'n perfformio cerddoriaeth Gymraeg mewn arddull jazz traddodiadol / dixieland. Mae repertoire Cymraeg y band yn cynnwys caneuon traddodiadol, emynau a chaneuon poblogaidd o'r degawdau diwethaf.

Tocynnau ar gael o Acapela neu o'r wefan: [www.acapela.co.uk](http://www.acapela.co.uk)

Nos Sadwrn, Mai 25ain 7.30 - Acapela,

Richard James a'r Band: Un o gyfansoddwyr gwerin gorau Prydain, i'w glywed yn rheolaidd ar BBC R2

Tocynnau ar gael o Acapela neu o'r wefan: [www.acapela.co.uk](http://www.acapela.co.uk)

Nos Wener, 7fed Mehefin 7.30 - Acapela, Catrin Finch yn perfformio 'Amrywiadau Goldberg' gan JS Bach

Tocynnau ar gael o Acapela neu : [www.acapela.co.uk](http://www.acapela.co.uk)



Nos Sadwrn, 8fed Mehefin 7.30 - Acapela

Noson yng nghwmni Gwyneth Glyn & Tauseef Akhtar (Prosiect Cerddoriaeth Womex



rhwng Cymru a'r India)

Tocynnau o Acapela neu o'r wefan: [www.acapela.co.uk](http://www.acapela.co.uk)

Nos Sul, 9fed Mehefin 7.30 - Acapela, Cyfle i glywed 'ALAW', band gwerin newydd (acordion, ffidl a gitar) yn cynnwys Oli Wilson-Dickson, Dylan Fowler a Jamie Smith. Cariad at alawon hyfryd sydd wrth wraidd y grŵp newydd yma. Tocynnau ar gael o'r wefan: [www.acapela.co.uk](http://www.acapela.co.uk)

**CLWB NAINI gydag ELINOR BENNETT Dydd Sul 12 Mai am 10.30**

Cân a stori i blant bach

Yn y gyfres o gyflwyniadau byrion, bydd y delynores, ELINOR BENNETT yn canu caneuon gwerin a hwiangerddi traddodiadol Cymraeg gyda phlant ifanc o dan 6 oed.

Bydd llawer o'r caneuon yn rhai a ddysgodd Elinor gan ei Nain ei hun pan oedd yn blentyn bach, a rhai eraill yn dod allan o hen gasgliadau o hwiangerddi a chaneuon plant.

Cadw'r caneuon yn fyw ydi'r nôd ac efallai fod rhai o'r caneuon heb fod yn cael eu canu heddiw, ond fe hoffai Elinor eu cyflwyno i'w hwyrion a'u hwyresau a'u cyfeillion gydag ambell stori.

Tua 30 - 40 munud fydd hyd pob sesiwn, ac anogir y plant i ymuno yn yr hwyl trwy ganu, dawnsio a gwrando.

## CORNEL Y PLANT



Chwiliwch am y llwybr cywir i'r wenynen fedru cyrraedd y blodyn mawr!



### CWIS YR URDDI

- 1) Beth yw bathodyn enwog Yr Urdd?
- 2) Pwy wnaeth sefydlu Urdd Gobaith Cymru?
- 3) Ble mae dau wersyll enwog Yr Urdd?
- 4) Enwch ddau beth rydych yn gallu eu gwneud yn y gwersylloedd yma?
- 5) Ble mae Eisteddfod Yr Urdd eleni?

Edrychwch ar y ddau lun o'r anifeiliaid ar y fferm, a chwiliwch am y gwahaniaethau. Mae wyth gwahaniaethau.





www.mentercaerdydd.org  
029 20 689888

**www.tafwyl.org**

Mae gwefan newydd Tafwyl nawr yn fyw gyda gwybodaeth am yr Wyl yn y Castell ar 15 Mehefin a gweithgareddau'r wythnos. Cofiwch hefyd bod modd dilyn Tafwyl ar Twitter a Facebook am y newyddion diweddaraf!

**Howard Marks – Tocynnau ar werth nawr**  
Prin nad oes angen cyflwyniad i'r gŵr hwn o Kenfig Hill ger Pen-y-bont ar Ogwr, sydd heb os yn mynd i fod yn un o uchafbwyntiau ffair Tafwyl eleni. Yn ddiweddar mae Howard Marks wedi teithio gwyliau dros y byd yn sôn am ei fywyd, a bydd yn bleser ei groesawu yn ôl i Gymru lle bydd y comedïwr Daniel Glyn yn sgwrsio ag o yng Ngŵyl Tafwyl y 15fed o Fehefin yng Nghastell Caerdydd. Mae'r tocynnau, sy'n £5, ar gael nawr ar wefan Menter Caerdydd – mentercaerdydd.org. Trefnir mewn cydweithrediad â Llenyddiaeth Cymru.

**'Bake off' Tafwyl**

**Castell Caerdydd / 15.06.06**

**Hoffi pobi? Mwynhau rhaglen Great British Bake Off? Beth am gystadlu yn Bake Off cyntaf Tafwyl? Bydd tri categori ar gyfer cystadlu:**

- 1) O dan 11: Pobi ac Addurno 6 o Gacennau Bach (£2 i gystadlu)
  - 2) O dan 16: Pobi ac Addurno 6 Cupcake (£2 i gystadlu)
  - 3) Oedolion: Pobi ac Addurno Cacennau Sbwng 2 haen neu fwy (£3 i gystadlu)
- Bydd angen i chi ddod â'ch cacennau i'r Castell erbyn 11am ar ddiwrnod Tafwyl. Cofrestrwch i gystadlu ar wefan Menter Caerdydd [www.mentercaerdydd.org](http://www.mentercaerdydd.org) cyn Dydd Llun, Mehefin y 3ydd.

**Cyrsiau Hyfforddiant i Oedolion**

Bydd y cyrsiau hyfforddiant isod yn cael eu cynnal cyn diwedd tymor yr haf. Am fwy o fanylion ewch i wefan Menter Caerdydd neu cysylltwch ag Angharad Thomas [angharad@mentercaerdydd.org](mailto:angharad@mentercaerdydd.org) / 2068 9888

**Iaith ar Waith yn y Dosbarth** (21 a 28.06 a 05.07). Cwrs 3 diwrnod i wella Sgiliau ac Ymwybyddiaeth Ieithyddol ar gyfer cynorthwywyr dosbarth.


**Proffesiynoldeb yn y Gweithle** (27.06)  
Cwrs diwrnod i gynorthwyr dosbarth fydd yn canolbwyntio ar ddisgwyliadau yn y gweithle fel agweddau cadarnhaol, ymddygiad a sgiliau priodol.

**Cwis y Mochyn Du**


Bydd cwis yn cael ei gynnal Nos Sul, Mai 26 yn y Mochyn Du am 8pm. £1 y person. Mae croeso cynnes i baw! Cofiwch bod y cwis ar Nos Sul olaf bob mis!

**Holiadur Gwasanaethau Menter Caerdydd**

Diolch yn fawr iawn i baw sydd eisioes wedi llenwi ein holiadur diweddar am wasanaethau a



**Dyma gyfle arall i chi ennill Tocyn Llyfrau**




**Ar Draws**

1. Tynnu o'r wraidd (10)
8. Ymaflyd (7)
9. Chwaraewr rygbi rhwng dau brop (5)
10. Lan (4)
11. Hurtynd (4)
12. Ciwb Chwarae (3)
14. Fel dafad fach (6)
15. Difater (6)
18. Twll i gordyn (3)
20. Llinell (4)
21. Dihiryn (4)
23. Dafad fach (5)
24. Arswydus (7)
25. Chwenychiadau (10)

4. Lleihau mewn gwerth (8)
5. Cyflwr da'r corf (5)
6. Yn perthyn i'w brodor cyntaf (11)
7. Y cyflwr o fod yn llawn gras (4)
13. Cilio o'r golwg (8)
16. Rhannau o bennod y Beibl (7)
17. Gwatwreg (6)
19. Adeilad i drin gwlan (5)
22. Yn hytrach na (4)

**Atebion i: Croesair Col**  
**34, Pen Bryn Hendy, Yr Encil, Meisgyn, Pontyclun. CF72 8QX**  
erbyn 20 Mai 2013

**Atebion Ebrill**



gweithgareddau'r Fenter. Mae dal cyfle i chi ymateb a chyfrannu drwy lenwi'r arolwg ar ein gwefan.

**Hanner Tymor Sulgwyn**  
Cofiwch gadw llygad ar wefan Menter Caerdydd am wybodaeth lawn am weithgareddau hanner tymor! Byddwn yn cynnal Cynlluniau Gofal, sesiynau Bwrlwm, Miri Meithrin a llawer mwy...

## Ysgol Gynradd Gymraeg Garth Olwg



### Taith afon Taf Blwyddyn 5 Mrs Davies gan Huw Griffiths

Fel rhan o'n thema Troi a Llifio aeth ein dosbarth i ddilyn cwrs yr Afon Taf mewn bws mini lan i Fannau Brycheiniog. Cerddon ni lan at darddiad yr Afon Taf ar ddechrau Pen-y-Fan. Roedd y lle yn bert iawn. Gwelon ni geffylau gwyllt yn pori'n dawel ac yn heddychlon ar y glaswellt. Hefyd gwelon ni llednant, nentydd, rhaedrau bach a mawr a dyfroedd gwyllt. Roedd rhostiron del a gwelon ni'r fyddin yn ymarfer.

Wedyn teithion ni lawr i gronfa ddŵr Coed Taf Fawr. Dysgon ni bod y cronfa ddŵr wedi cael ei chreu gan ddydd felly doedd e ddim yn naturiol.

Ar ôl hynny fe aethon ni lawr i Goed-y-Cwm. Roedd yna safle trin dŵr fyna. Roedd yn drewi fel pŵ!! Ar ôl hynny fe aethon ni nôl i'r bws. Wedyn cerddon ni i'r parc i fwyta ein bwyd.

Wedyn fe gerddon ni nôl i'r bws a gyrron ni i Bontypridd. Cyrhaeddon ni Bontypridd ac fe welon ni'r bont. Roedd yr afon yn llifo'n llawer mwy araf. Syllon ni ar y bont am ddeng munud.

Wedyn fe deithion ni i Fae Caerdydd. Gwelon ni'r 'barrage' a'r bont newydd. Chwaraeon ni am ugain munud. Edrychon ni ar yr aber. O'r diwedd roedd yr Afon Taf wedi gorffen ei thaith. JOAIS I MAS DRAW!!!!

### Traws Gwlad

Llongyfarchiadau i bawb a fu'n cystadlu yn rasmus Traws Gwlad yr Urdd. Bu'r ysgol yn llwyddiannus iawn.

### Marathon

Diolch o galon i bawb sydd wedi noddi Mr Gruffydd ar gyfer Marathon Llundain. Casglwyd eisoes £2,077.05 i Dolen Cymru. Cafodd Mr Gruffydd amser anhygoel o 3 awr 38 munud.

### Cwis

Llongyfarchiadau mawr i dim 1 Garth Olwg ar ennill rownd rhanbarthol cystadleuaeth gwybodaeth gyffredinol y Quiz Club.

### Athletau Dan Do

Llongyfarchiadau i dîm Garth Olwg ar ennill cystadleuaeth Athletau dan Do y Sir.

### Cwis Llyfrau

Llongyfarchiadau i dîm Blwyddyn 3 a 4 ar ennill Cwis Llyfrau y Sir. Byddant yn awr yn cystadlu yn y rownd Genedlaethol a gynhelir yn Aberystwyth ym mis Mehefin.

## YSGOL CREIGIAU

Croeso nôl i Mrs Glenda Griffith! Mae Mrs Griffith wedi bod ffwrdd ar gyfnod mamolaeth – brâf cael ei chwmmi unwaith eto.

Mae'n dymor newydd ac mae'n argoeli i fod yn un prysur a chyffrous iawn.

Mae'r tîm rygbi eisioes wedi bod yn cystadlu yn nhwrnament yr Urdd gan lwyddo i gyrraedd y rownd gyn-derfynol. Llongyfarchiadau iddyn nhw! Roeddent yn chwarae yn eu cit newydd. Diolch i Dr. Nick Stallard am ei gwneud hi'n bosib i ni fuddsoddi yn y cit newydd. Roedd y bois yn edrych yn smart iawn!

Mae'r tîm pêl-droed wrthi'n ymarfer yn brysur hefyd. Fe fu gêm gyfeillgar rhyngddynt ag Ysgol Gynradd Tonysuboriau yn ddiweddar. Cafwyd llawer o hwyl. Chwaraewyd dwy gêm, gyda'r tîm yn colli un ac yn dod yn gyfartal yn yr ail. Da iawn bois!

Mae'n amser prysur yng ngardd yr ysgol ar hyn o bryd gyda llawer o blannu'n mynd ymlaen. Mae disgyblion B1.5 wrth eu boddau'n cael helpu.

Mae thema newydd gan bob dosbarth y tymor yma gyda nifer o dripiâu wedi eu trefnu. Mae Dosbarth 2 yn mynd i Gastell Coch ac mae Dosbarthiadau 3 a 4 yn mynd i Fosg a Synagog. Fe aeth Dosbarth 5/6 i Fae Caerdydd ar ddechrau'r tymor fel rhan o'u thema Daearyddol. Fe groeson nhw'r Bae draw i Benarth a nôl ar gwch, defnyddio olwyn fetri i fesur perimedrau, cyn cael cynllunio a chreu adeiladau 3D allan i glai. Diwrnod gwych!

### Pêl-rwyd

Diolch yn fawr iawn i Tracy Oatridge-banc HSBC am wneud match funding, sydd wedi ein galluogi ni i brynu gwisgoedd newydd i'r tîm pêl-rwyd. Diolch hefyd i Mrs Watts am archebu'r ffrogiau. Pob hwyl i'r plant sydd ar fin dechrau cynghrair pêl-rwyd Ysgolion y clwstwr.

### Meithrin / Derbyn

Mae'r dosbarthiadau Meithrin a Derbyn yn mwynhau'r thema newydd sef Arweinwyr Cymunedau. Mae'r dosbarth Meithrin wedi bod am dro i'r pentref i ddysgu am yr ardal leol. Roeddent nhw wrth eu bodd yn ymweld a Jen yn Cutting Corner, y plismon, y pobydd, y siopwraig yn Flower Power a gweld y Swyddfa Bost, Optegydd a'r Golchdy.

Mae nifer o siaradwyr wedi rhannu gwybodaeth am eu swyddi e.e. y Llyfrgellydd, nyrs, a morwr o'r Llynges.

Mae nifer o ymweliadau eraill wedi eu trefnu hefyd. Diolch i bawb am fod mor barod i ddod i siarad gyda'r plant.

## YSGOL GYNRADD GYMRAEG TONYREFAIL

### Llongyfarchiadau!

Llongyfarchiadau i Mrs Donna Davies a'r gŵr James ar enedigaeth eu mab bach, Oliver James.

### Croeso

Croeso mawr i Miss Rebecca Gatt a Mr Aled Power i'r ysgol. Mae'r ddau yn fyfyrwyr ym Mhrifysgol Abertawe. Bydd Miss Gatt yn addysgu blwyddyn 4 a bydd Mr Power yn addysgu blwyddyn 2. Hoffwn estyn croeso cynnes i'r ddau.

### Traws gwlad yr Urdd

Bu aelodau o Flynyddoedd 3-6 yn cynrychioli'r ysgol yn ystod cystadleuaeth traws gwlad yr Urdd. Llongyfarchiadau i bawb a fu'n cystadlu, yn enwedig i Keeley Adams o flwyddyn 5 am ennill ras y merched (BL 5 a 6). Roedd hi'n ddiwrnod llwyddiannus iawn i'r ysgol wrth i dîm merched blwyddyn 5 a 6 ddod yn gyntaf a'r bechgyn yn drydydd. Diolch i'r holl ddisgyblion wnaeth gymryd rhan.

### Pêl-fasged

Roedd blwyddyn 5 a 6 yn drist iawn wrth ffarfelio a Missy Lender o'r Rhondda Rebels ar ddiwedd tymor y gwanwyn. Mae Missy wedi bod yn dysgu sgiliau pêl fasged i'r dosbarth ers dau dymor.

### Twrnament pêl-droed

Aeth criw o ddisgyblion blwyddyn 4, 5 a 6 i gynrychioli'r ysgol yn nhwrnament pêl-droed 7 bob ochr yng Nghanolfan Gymunedol, Gilfach Goch. Rhoddodd bawb ymdrech ardderchog yn erbyn y timau lleol eraill a chipion nhw'r wobwr gyntaf - campus!

### Gweithdy Masnach Deg

Daeth Mr Emyr Williams a Miss Elly Jones o siop SUSSED ym Mhorthcawl i gynnal gweithdai masnach deg, cyffrous i flynyddoedd 3-6. Mwynhawyd yn fawr.

### Her Darllen

Mae nifer o ddisgyblion wedi bod yn brysur iawn wrth gymryd rhan mewn her darllen a gafodd ei lawnsio gan RhCT i hyrwyddo a dathlu darllen yn yr ysgol ac yn y cartref. Roedd 'gwobr' o 500 milltir am bob 10 munud o ddarllen ac roedd y milltiroedd yn cael eu casglu mewn pasbort arbennig oedd yn dangos faint oedd wedi ei ddarllen yn ogystal â dilyn taith yr unigolyn. Roedd angen teithio 33,000 milltir i deithio o amgylch y byd i gyd! Cafodd pob plentyn dystysgrif a chyfle i nodi ei h/enw ar gerdyn post a bod yn rhan o raffl fawr er mwyn ceisio ennill gwobr i'r ysgol. Llongyfarchiadau mawr i bawb a gwblhaodd yr her!

## Ysgol Creigiau



Bois y tîm rygbi yn eu cit newydd gyda'u hyfforddwr Mr Balbini.



Rhai o ddisgyblion Blwyddyn 5 yn helpu yn yr ardd.



Creu adeiladau 3D allan o glai.



Mesur perimedrau yn y Bae



Tîm pêl-droed yr ysgol yn chwarae yn erbyn ysgol Tonysguboriau.

## Ysgol Garth Olwg



Tîm Traws-gwlad llwyddianus



Enillwyr y Quiz Club



Llongyfarchiadau i dîm Garth Olwg ar ennill cystadleuaeth Athletau Dan Do y Sir.



Tîm Blwyddyn 3 a 4 a enillodd Cwis Llyfrau y Sir



Gwisgoedd newydd y tîm pêl-rwyd.

## Ysgol Tonyrefail



Gweithdy Masnach Deg



Keeley Adams, B15 enillydd ras traws-gwlad

**CYMRAEG**  
**RHONDDA CYNON TAF**  
**MAE DEWIS 'DA TI**  
**@CyngorRhCT**

**DYDCH CHI'N DEFNYDDIO TWITTER?  
 EISIAU GWYBOD BETH YW BETH?**

Mae Cyngor Rhondda Cynon Taf wedi sefydlu cyfrif Twitter Cymraeg, sef @CyngorRhCT

Felly, dilynwch ni am y newyddion diweddaraf a thrydar gyda thrydarwyr eraill. Ewch gyda'r lliw a chefnogwch y Gymraeg!

Dilynwch ni ar **twitter**

**RHONDDA CYNON TAF**  
 RYDYM ABBRAC | FERRING FUTURE  
 RYDYM ABBRAC | FERRING FUTURE  
 RYDYM ABBRAC | FERRING FUTURE

## Ysgol Llanhari

### Y Chweched

Mae 52 o fyfyrwyr y chweched dosbarth wedi cael cynigion o amryw o Brifysgolion eleni, gyda rhai yn derbyn cynnig o Brifysgolion safon uchel iawn. Mae Cory Davies wedi derbyn cynnig di-amod o Brifysgol Aberystwyth i astudio Gwleidyddiaeth Rhwngwladol yn dilyn ei berfformiad cryf yn yr arholiadau ysgoloriaeth. Llongyfarchiadau mawr iddo fe, a phob dymuniad da i weddill y myfyrwyr yn yr arholiadau allweddol i ddod.

Llongyfarchiadau gwresog i Dewi Jones (Llanharan) o flwyddyn 13 ar ennill gwobr Myfyriwr y Flwyddyn (wedi noddi gan Lwybrau dysgu 14 - 19 Penybont). Mae Dewi yn astudio 2 bwnc lefel A yn Ysgol Llanhari ac yn astudio safon uwch Ffilm yng Ngholeg Penybont. Mae ennill y wobwr yma yn dystiolaeth o'i waith caled a'i bresenoldeb ardderchog ar hyd y ddwy flynedd.

### Cerddorion, dawnswyr ac actorion Llanhari

Ymfalchiwn ar gamp Megan Griffith Blwyddyn 12 yn ennill cystadleuaeth Cantores Ifanc y Flwyddyn Dunraven a gyflwynwyd gan Gôr Meibion Maesteg yn ddiweddar.



Braf oedd gweld Ifan Jenkin Bl 12 yn westai ar raglen gyntaf cyfres deledu newydd Margaret Williams nos Sadwrn. Fel enghraifft o dalent newydd, addawol, cawsom flas o'i ddawn fel pianydd a gwrando arno'n sgwrsio am ei brofiadau cerddorol.



Mae Gwynfor Dafydd o Fl 10 yn ymddangos ar raglen S4C Gwaith Cartref ar hyn o bryd.

Llongyfarchiadau i Paige Jenkins Bl 10 ar ei llwyddiant yn ei harholiad Ballet Gradd 6.

Llongyfarchiadau a phob dymuniad da i'r cystadleuwyr a ddaeth yn fuddugol yn Eisteddfod Sir yr Urdd yn ddiweddar. Sir Benfro a'r Genedlaethol amdani!

Alys John - unawd merched dan 15


Angharad Davies-unawd llinynnol dan 15  
Beca Ellis- unawd alaw werin dan 15  
Siwan Henderson- Unawd merched dan 19  
Parti Merched dan 15  
Ifan Jenkin – Unawd Piano dan 19  
Parti Llefaru 7.8.9. Parti llefaru 10-13  
Ymgom 10-13. Ymgom Ddigr 10 -13

### Rygi 7 bob ochr

Ddydd Iau diwethaf chwaraeodd tîm rygi 7 bob ochr Bl.8 yr ysgol yn nhrnament ysgolion Pontypridd. Enillon ni pob gêm ond am un gêm gyfartal yn erbyn ysgol Bryn Celynnog. Ar ddiwedd y dydd aethon ni ymlaen i'r ffeinal a chwarae Ysgol Gartholwg a'i curo nhw 64-0. Ein prif sgorwyr oedd Iwan Griffith, Dewi Cross a Liam Bradford.

### Nofwraig dalentog

Mae Shauna Hayes Withers, Bl.8 wedi cael tymor arbennig yn y pwll nofio. Bu'n cystadlu mewn sawl gala lefel 1 – sef y lefel uchaf posib a chafodd ei dewis i gystadlu mewn pencampwriaethau yn Jersey a Sheffield! Rydym yn ei llongyfach ar ennill ei lle i gystadlu ym 'Mhencampwriaethau'r Haf' eleni. Soniodd aderyn bach hefyd y bydd yn cael mynychu 'gwrsyll hyfforddi' yng Nghyprus y flwyddyn nesaf. Braff iawn Shauna a phob hwyl i ti!



### Bydi am Byth

Rydym yn hynod falch ein bod nawr wedi cychwyn ein system BYDI rhwng yr adran gynradd ac uwchradd. Cyn y Pasg, daeth dros 30 o ddisgyblion Blwyddyn 7 ac 8 i'r adran gynradd er mwyn cwrdd â'r plant a dod i'w hadnabod. Ein bwriad dros y tymor nesaf yw y bydd y BYDIs yn treulio amser yn yr adran gynradd yn chwarae gyda'r plant, yn eu cynorthwyo yn eu gwaith ac yn eu cefnogi wrth iddynt lwyddo mewn amryw weithgareddau. Mae'r BYDIs yn barod wedi gwyllo disgyblion Cadi Cwningen a Dewi Draenog yn ymarfer ar gyfer yr orymdaith hetiau Pasg! Maen nhw nawr yn ymarfer yn brysur ar gyfer darllen storïau iddynt ac yn edrych ymlaen yn arw at eu cefnogi yn y mabolgampau ym mis Mehefin ac ar eu diwrnod graddio ym mis Gorffennaf!



### Y Bydis



Shannon, Charlotte ac Eleri o Flwyddyn 8 yn helpu Dilan, Sienna ac Olivia wrth adeiladu.

### Croeso

Hoffem estyn groeso cynnes i Miss Emma Rees sydd wedi ymuno â ni i wneud cyfnod mamolaeth fel cynorthwywraig yn nosbarth Cadi Cwningen.

Croeso hefyd i Miss Emma Bird sydd yn gweithio â disgyblion Cadi Cwningen. Mae Emma wrthi yn gweithio tuag at ei lefel 3 ar ei chwrs CACHE.

### Geni Merch

Llongyfarchiadau i Miss Carly Ryan, cynorthwy-wraig yn Nosbarth Dewi Draenog, a'i phartner Barry ar enedigaeth eu merch fach, Sadie.

Llongyfarchiadau hefyd i Miss Leana Stansfield o'r Adran Wyddoniaeth a'i phartner ar enedigaeth Mali.

### Gweithgareddau'r Pasg

Roedd neuadd yr ysgol yn llawn mamau-cu a thadau-cu Dosbarth Dewi Draenog a Dosbarth Cadi Cwningen ar gyfer ein gorymdaith hetiau Pasg cyn y gwyliau. Cymdeithason nhw gyda phaned o de a chacen cyn gwyllo eu hwyrion ac wyresau yn arddangos eu hetiau bendigedig, lliwgar. Diolch i'r rhieni am eu cefnogaeth wrth baratoi eu plant ar gyfer y diwrnod arbennig hwn.



Trefnodd 'Ffrindiau Llanhari' helpa wyau Pasg a disgo ar gyfer y plant yn dilyn yr orymdaith. Roedd y plant wrth eu boddau yn dilyn llwybr y bwni Pasg ac yn ddiweddarach yn dawnsio, canu a chwarae ymysg y swigod uwch eu pennau yn y disgo! Diolch i 'Ffrindiau Llanhari' am drefnu eu digwyddiad llwyddiannus cyntaf ar gyfer y plant cynradd.

### Cywion bach

Yn rhan o'n thema 'Ffrindiau'r Fferm', rydym wedi buddsoddi mewn deorfa! Mae'r disgyblion yn hollol gyffrous ac yn edrych ymlaen at gael gwrdd â'r cywion bach! Mae hwn yn gyfle delfrydol i'r disgyblion ddysgu am gyloch bywyd iâr mewn ffordd hwyl ac ymarferol a deall pwysigrwydd gofalu am anifeiliaid newydd.

## Ysgol Gyfun Garth Olwg



### Dawns Greadigol

Llongyfarchiadau i ferched blwyddyn 8 Ysgol Gyfun Garth Olwg ar ddod yn gyntaf yng nghystadlaeth y Dawns Greadigol yn yr Eisteddfod Sir ym mis Mawrth. Aelodau'r grŵp yw Carys Bowen, Taome Edwards, Georgia Jenkins a Jessica Davies. Dyma'r tro cyntaf i'r merched gystadlu yn y gystadlaeth hon a derbyniodd y grŵp feiriadaeth addawol iawn! Pob lwc i chi yn yr Eisteddfod Genedlaethol yn Sir Benfro!

### Gwaith Blasus

Enillodd Megan Meadows 7H, Tallis Griffith 7H ac Indeg Lacey 7H y wobwr 1af, 2ail a 3ydd yn y gystadlaeth Gwaith creadigol 3D ar gyfer Eisteddfod yr Urdd eleni. Llongyfarchiadau mawr iddyn nhw!

### Mentoriaid Cyfoedion

Mae menter gyffrous newydd ar y gweill yng Ngarth Olwg. Yn dilyn trafodaethau yn y Cyngor Ysgol am bob math o fwlian, hyfforddwyd nifer o aelodau o flwyddyn 10, 11 a 12 i fod yn Fentoriaid Cyfoedion. Mae'r criw wedi creu fideo i ddangos i blant iau'r ysgol yn esbonio beth yw eu rôl a'u cyfrifoldebau. Rydym yn edrych ymlaen at weld dylanwad eu gwaith!



### Noson Gwobrwyo

Fe ddaeth disgyblion a chyn ddisgyblion at ei gilydd i ddathlu eu llwyddiannau yn ein noson wobrwyo. Y gŵr gwadd oedd Dr. Phil Ellis ac fe gyflwynodd ef sawl gwobr gan gynnwys tystysgrifau TGAU a Lefel A a gwobrau arbennig fel gwobr goffa Gwenan Brooks. Cyflwynwyd y wobwr er cof am Athrawes Ffiseg yr Ysgol i Aled Humphreys cyn ddisgybl yr Ysgol, am ddangos agwedd frwdfrydig tuag at y pwnc. Roedd hi'n noson arbennig iawn!

Ffisegwyr Garth Olwg yn tracio Eiddo'r BBC.



Cychwynnodd y daith i'r "Celtic Manor" ym mis Hydref 2012, gyda phedwar pererin brwdfrydig fel rhan o gystadlaeth flynyddol Cynllun Addysg Peirianeg Cymru ([www.eesw.org.uk](http://www.eesw.org.uk)). Bwriad y cynllun yw denu mwy o fyfyrwyr disglair i astudio Peirianeg fel pwnc yn y brifysgol, trwy gydweithio ar brosiect gyda chwmmi peirianeg lleol a defnyddio adnoddau prifysgol.

Aeth y pedwar ohonom ymlaen i'r gweithdy deuddydd ym Mhrifysgol Morgannwg ym mis Rhagfyr. Yn cydgerdded gyda ni oedd ein partner David Williams, peiriannydd o'r BBC. Ein tasg oedd ffeindio ffordd o dracio offer drudfawr y peirianwyr a dynion camera a sain ar hyd safleoedd y BBC yng Nghymru. Roedd angen i ni'r pedwar pererin gwydn rannu'r gwaith a brwydo ymlaen hyd fis Mawrth i greu dogfen broffesiynol i gyflwyno i'r panel beirniadu.

O'r diwedd, pen y daith! Ystafelloedd cynadledda'r Celtic Manor, a'r cyflwyniad llafar i'r panel beirniadu. Trafodon ni ein cynlluniau gyda'r panel am ugain munud ac ateb cwestiynau lu. Roedd cyfle arbennig ar y diwrnod i ni ymweld â stondinau Prifysgolion a chwmmiau, i holi am yrfaeodd a nawdd.

Llongyfarchiadau i Liam Collins-Jones, Jacob Pahulo-Smith, Matthew James a Joshua Sayle ar eu hymdrech. Bydd y profiad o fantais mawr iddyn nhw wrth geisio am le yn y Brifysgol.

*Hoffai'r ysgol a'r disgyblion ddiolch yn fawr i David am ei waith caled ac i'r EESW am drefnu'r cwbl ers dros 20 mlynedd bellach. Pob lwc i dîm 2014!*



### Taith Gwlad Yr Ia

Am 1 o'r gloch y bore ar y 21ain o Fawrth, cychwynnodd 41 o ddisgyblion a 5 athro o Ysgol Gyfun Garth Olwg ar eu taith i Wlad yr Ia. Ni chysgodd lawer o blant ar y bws na'r awyren felly roedden nhw'n flinedig iawn. Serch hyn, nid oedd yn broblem gan fod cyffro ac adrenalin y plant yn eu cadw ar ddiuhyn. Ar y diwrnod cyntaf aethon nhw i'r Blue Lagwn lle ymlaciodd pawb yn y dŵr twym. Roedd yna arogl cryf o sylffwr yn yr awyr, ond roedd pawb yn mwynhau gormod i boeni!

Ar yr ail ddiwrnod, roedd pawb wedi blino'n lân, a chysgodd nifer ohonynt ar y bws. Roedd y tywydd yn oer ac yn wyntog, ond roedd golygfeydd rhaeadr Gulfoss, y geiser a'r llosgfynydd yn ddigon i atal y plant rhag cwyno gormod! Ar ddiwrnod olaf y daith, ymwelon nhw â rhagor o raeadrau, rhewlif enfawr a thraeth hynod o wyntog! Am tua hanner awr wedi deg y noson honno gwelodd y grŵp lwcus Oleuadau'r Gogledd! Cafodd y plant eu mesmereiddio gan y lliwiau estron. Roedd yr athrawon Daearyddiaeth bron â chrio gyda'r cyffro! Wrth lwc, llwyddodd Mr Jones i ddal y cyfan ar gamera.



### Telynorion

Ddydd Sadwrn, Mawrth 23ain aeth dwy delynores o flwyddyn 7, sef Ella Jones-Isles a Morgan Evans ar gwrs Telynu Morgannwg yn Theatr Soar, Merthyr. Hefyd, buon nhw, a thair merch arall, sef Rebeca a Carys Preddy a Caitlin Sparkes yn canu'r delyn ym Mhen-y-bont fel rhan o ddathliadau i gofio'r telynor enwog John Thomas.

### "First campus"

Yn ystod yr wythnos ddiwethaf aeth disgyblion blwyddyn naw ar drip i'r Brifysgol Fetropolitan yng Nghaerdydd. Cafon nhw gyfle i ymweld â'r brifysgol a chael cip olwg ar y math o gyrsiau sy'n cael eu cynnig ar y safle. Cafon nhw amser arbennig o dda. Dywedodd Jack Osborne "Roedd y cwrs yn dda ac yn rhoi blas i ni ar gyfer ein dyfodol".

## Penllanw'r tymor i Bontypridd

Mae'r tymor yn dirwyn i ben i Glwb Rygbi Pontypridd ond gyda dwy gêm enfawr eto i ddod a'r cyfle i hawlio'r dwbwl, sef cwpan SWALEC a choron Uwch Gynghrair Cymru.

Beth bynnag fydd ffawd y tîm yn y ddwy gêm derfynol hynny, mae'r tymor eisioes wedi bod yn un aruthrol o lwyddiannus. Hyd at benwythnos olaf mis Ebrill dim ond un gêm roedd Ponty wedi ei cholli yn y gynghrair o'r un-ar-hugain a chwaraewyd, a sicrhawyd buddugoliaethau hefyd ym mhob rownd o'r cwpan i gyrraedd y rownd derfynol.

Enillwyd pob un gêm gartref a chwaraewyd ar faes Heol Sardis, gan ail hawlio i'r lle yr enw House Of Pain. Ymysg y buddugoliaethau mawr roedd y rheini yn erbyn timau proffesiynol Leinster o'r Iwerddon a Leeds Carnegie o Loegr, hynny yng Nghwan Prydain ac Iwerddon.

Mae hyfforddwy'r Pontypridd, Dale McIntosh a Paul John, wedi bod yn garcus wrth lywio'r clwb trwy'r tymor hir a chaled, gan orffwys chwaraewyr a dibynnu ar gryfder y garfan i gadw'r momentwm i fynd.

Yn ystod y mis diwethaf cafwyd buddugoliaethau, ac yn fwy na hynny, berfformiadau hynod o lewyrchus yn erbyn timau fel Jersey, Caerdydd ddwywaith a Bedwas.

Yn awr mae'r holl ymdrech a'r llwyddiant sydd wedi gweld Ponty yn diweddur tymor dros ugain pwynt yn glir ar frig yr adran, yn dibynnu'n llwyr ar ddwy gem sydd yn weddill.

Ddydd Sadwrn 4ydd o Fai bydd Ponty yn herio Castell Nedd yn Stadiwm y Mileniwm yn rownd derfynol Cwpan SWALEC. Mae'r gêm yn cychwyn am 5:30pm ac yn cael ei darlledu yn fyw ar S4C.

Ddydd Sadwrn 18fed o Fai bydd Ponty yn chwarae yn rownd derfynol gemau ail-gyfle'r Uwch Gynghrair - yr ornest hon fydd yn penderfynnu pwy fydd y pencampwr. Ar Heol Sardis y caiff y gem ei chwarae, eto i'w dangos yn fyw ar S4C.

Os am brofi cyffro penllanw'r tymor i Bontypridd, dewch lawr i Heol Sardis i wyluo'r gemau mawr. Mae'r manylion i gyd ar wefan y clwb: [www.ponty.net](http://www.ponty.net)



## Ysgol Llanhari (parhad o dudalen 14)

### Blwyddyn 9 yn y gweithle

Cafodd disgyblion Blwyddyn 9 ddiwrnod gwerth chweil yn ddiweddar yn ymweld â'r Byd Gwaith fel rhan o'r rhaglen Partneriaeth Addysg a Busnes. Cawsant ymweld â Gwesty'r Vale (gan weld aelodau o dîm rygbi Cymru yn ymlacio ar ol y gêm fawr!), safle GEAS yn Nantgarw, Castell Cyfarthfa a Chanolfan Amgen Cymru Bryn Pica ble buon nhw ar safari ailgylchu mewn 'jeep'!



Blwyddyn 9 yng Nghanolfan Amgen Cymru, Bryn Pica

### Ffrindiau Llanhari

Cafwyd Noson Rasmus hwyliog yng Nghlwb Rygbi Pontyclun nos Wener y 19eg o Ebrill. Hon oedd ail noson gymdeithasol Ffrindiau Llanhari sef cymdeithas rhieni, athrawon a holl ffrindiau'r ysgol. Diolch i bawb am gefnogi.



Gorfoleddu wrth ennill ras

## Ysgol Garth Olwg yng Ngwlad yr Iâ parhad o dudalen 15



Wrth ymyl rhaeadr Gulffoss

Gweithgareddau Cymraeg tymor yr haf...

Gartholwg Lifelong Learning Centre

<p><b>Arad Goch</b> Cerdyn Post o Wlad y Rwia Llun, 3 Mehefin, 1:30pm Mawrth, 4 Mehefin, 10:30am £7</p> <p><i>Plant</i></p>	<p><b>Clwb Drama Cymraeg</b> Pob dydd Iau 5:30pm—6:30pm, 7—11 oed 3:30pm—4:30pm, 11 oed+ £3 y sesiwn</p> <p><i>Plant</i></p>
<p><b>Gweithgareddau Haf Chwaraeon Cymysg</b> Awst 19-23 10am-12pm, 5—7 oed 1pm—3pm, 8—12 oed £4 y sesiwn</p> <p><i>Plant</i></p>	<p><b>Ffitrwydd Cyffredinol</b> (Pob lefel) Nos Lun, 6pm-7pm (Tymor ysgol yn unig) £3 y sesiwn</p> <p><i>Deolion</i></p>
<p><b>Gŵyl Gartholwg</b> Sadwrn, 13 Gorffennaf 10am—2pm</p> <p><i>Pawb</i></p>	<p><b>Cyfrifiaduron Syml</b> Dydd Iau 11am—1pm</p> <p><i>Deolion</i></p>

Am wybodaeth bellach  
Canolfan Gartholwg - 01443 219589

twitter—@gartholwgllc facebook—Gartholwg Lifelong Learning Centre